

# Pexanialivaisi Jesucristo pelivaisi, San Marcos peyaquinaelivaisi

*Pacuenia Juan jivibautisabinë jivi livaisi tsipaeba petusato nacuata yabara pelivaisi  
(Mt 3.1-12; Lc 3.1-9, 15-17; Jn 1.19-25)*

<sup>1</sup> Mara pacuenia taxuxuaba pexanialivaisi, Jesucristo Dioso pexënato pelivaisije.

<sup>2</sup> Bajayata Diosojumepaebinëmi, profeta Isaíaspijkenë, tajëvelia yaquina Dioso pejumaitsijava pexënatojavabelia. Dioso jumaitsi pexënatojavabelia mapacueniaje:

Itorobianajë nevajënaeyabelia tanejumelivaisipaebinënexa. Catsivajënaexanebijitsia nijanamuto. <sup>3</sup> Nexata tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaeijitsia petuxanenë. Batoroviaexananua namuto. Bajara pijinia pacuenia paxamë ata panajamatatabëcuñexaniavaere pepo petuxanenë pepatsivajënaeya paxamëjavaberena,” jai tsane tanejumelivaisipaebinë xamë yabara,

jai bajayata tajëvelia Dioso pexënatojavabelia pejumaitsijava Juan jivibautisabinë jivijavabelia Dioso pejumelivaisi petsipaebanajetarucaejanexa yabara.

<sup>4</sup> Bajaraxuata nexata Juan jivibautisabinë Dioso pejumelivaisipaebinë najetaruca petusato nacuajava Jesús pevajënaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabécuenepénéyorore Diosojavabelia. Bajaraxuacujinae pacabautisabianatsi. Nexata Dioso pacavecuaajibiaexanaena panijaneconimi, jai tsaponae Juan jivijavabelia.

<sup>5</sup> Nexata ayaubitsaëtoxaneto Judea nacuapijivi, Jerusalén tomarapijivinua, muxunaponabiabatsi Juan petsipaebilivaisi penamuxunaevetabibinexatsi. Nexata bajarapamonae pibisiacuene pexanaejavami, rovialia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

<sup>6</sup> Juan naxatata camellonata pexanaejava. Naepacëta cuerobocoto. Pexaejava ébosese, jabëra yajava. <sup>7</sup> Juan Jesús pelivaisi jivi tsipaebapona. Jumai tsaponae tajëvelia Jesús yabara:

—Tacovëverena patsiana itsanë. Bajaraponë daxitacuene pexanaenexa pecaëjëpaenëtsi tsane. Xanë raja saya bevelijamatabécuenenënë bajaraponëvecua. Nexata vecuaauranë bajaraponë bepijajivitonënë tanataenexa. Nexata auranë pijazapato ata tataxujonotsinexa. <sup>8</sup> Xanë raja saya pacabautisabatsi merata. Ponë rajane xanëcujinae patsiana, bajaraponë pacatsijamatabëjoneyaexanaponaena Espíritu Santo, jai tsaponae Juan jivijavabelia Jesús yabara tajëvelia pevajunupaebijavata Jesús penajetarucaejavexa.

*Pacuenia Juan bautisaba Jesús yabara pelivaisi  
(Mt 3.13-17; Lc 3.21-22)*

<sup>9</sup> Jesús najetaruca Nazaret tomaraverena, Galilea nacuata peecaetomaraverena. Nexata Juan bautisaba Jesús Jordán meneta. <sup>10</sup> Jesús pebautisabujinaetsi menevetsina penonotajunaejavata, tane itaboxo penapatsijava. Bajarajota Jesús tane Espíritu Santo ata perunaejavatsica pematatsënëatsica beucucuto. <sup>11</sup> Jesús jumetanuela athëbëvetsica Dioso pejumaitsijavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

*Pacuenia Jesús jamatabëcueneëjëbatsi dovathi  
yabara pelivaisi  
(Mt 4.1-11; Lc 4.1-13)*

<sup>12</sup> Jesús Juan pebautisabujinaetsi, bepijiayo Espíritu Santo ponayaexanatsi petusato nacuayabelia. <sup>13</sup> Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatocabianëta dovathi picani Jesús jamatabëcueneëjëbatsi pibisiacuene pexanaenexa. Bajaraxuacujinae ángelevi runaica Jesús peyavenonaenexatsi.

*Pacuenia Jesús Galilea nacuata taxuxuuba  
Dioso pitorobilivaisi jivi petsipaebijava yabara  
pelivaisi*

*(Mt 12.12-17; Lc 4.14-15)*

<sup>14</sup> Juan penaneconitsiaexanaenexatsi vajabitsäe vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacuajavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. <sup>15</sup> Jesús jumai tsaponaе jivijabelia mapacueniae:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuene pënëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponaе Jesús jivijavabelia.

*Pacuenia Jesús junata cuatro ponëbeje dujuai  
peyamatajucabiabivi yabara pelivaisi*  
(Mt 4.18-22; Lc 5.1-11)

<sup>16</sup> Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabí canacujitsia dujuai yamatajucabiababeje. <sup>17</sup> Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinexa, jai Jesús bajaraponëbejejavabelia.

**18** Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

**19** Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatabeje. Bajaraponëbeje pijajeraënëta xanebanucabeje dujuai peyamatajucaejavabeje. **20** Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

*Pacuenia pebi dovathi peyajavaponaponaenë  
Jesús jamatejemayaexana yabara pelivaisi  
(Lc 4.31-37)*

**21** Nexata Jesús, pijajivi yajava, pata Capernaum tomarabelia. Judíovi penacueraevertsimatacabita Jesús joneya judíovi penacaetuatabiboyalia. Nexata bajarajota Jesús jivi livaisi tsipaeba. **22** Nexata Jesús pejumetaevtsi jamatabëcuenenabenajaca Jesús petsipaebilivaisi yabara. Bajarapamonae jamatabëcuenenabenajaca tsipaji xaniavaetsia Jesús tsipaeba Dioso pitorobinëtsicuenia. Apo tsipaebi pacuenia judíovi pecujarubivi tsipaebabiaba. **23** Bajarajota pebi dovathi peyajavaponaponaenë naeca. Nexata bajaraponë Jesúsjavabelia vavajai tsaxuabi. Jumaitsi:

**24** —¡Jesús, Nazaret tomarapijinëmë, paneve-cuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexénatomë, pepo pexaniajamatabëcuenenëmë, jai dovathi peyajavaponaponaenë Jesúsjavabelia.

**25** Jesús nexata jumeitaveta dovathi. Jumaitsi:  
—¡Moyamëre! ¡Vecuapitsapare baja maponëje! jai Jesús.

**26** Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jívitonëvecua.

**27** Nexata daxitajivi bajarapacuene itsa tane, bitso jamatabëcuenenabenajaca. Najumaitsi bajarapamonae:

—¿Detsa mapitsicueneje? ¿Detsa mapitsipe-janacujarubicueneje? ¡Maponëje Jesús, beDioso pitorobinëtsitsical! ¡Dovathi ata jumecovënëtatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

**28** Nexata daxita Galilea nacuapijivi bepijia Jesús vënëlivaisitanetsi Dioso pesaëta pinijicuenepexanaponaejava.

*Pacuenia Simón Pedro pijava pena Jesús tojamatejemayaexana yabara pelivaisi  
(Mt 8.14-15; Lc 4.38-39)*

**29** Jesús baja pitsapa judíovi penacaetuabiabibovecua. Nexata Santiagobeje Juanbeje Jesús yajavapona. Jesúsbana napona Simónbeje Andrésbeje pijaboyabelia. **30** Nexata Simón pijabota Simón pijava pena Jesúsbana pevajënae romaebanucatsi

camata. Nexata itsamonae bepijia Jesús tsipaebarëcpatsi bajarapova peromaebanucaejavatsi. <sup>31</sup> Nexata Jesús imoxoyotabalia peromaebanucaeverts. Cobeyotsiaya matacota. Nexata bajara-jota peromaebanucaeverts vecuaajibi tsanajetsitsireca baja domae. Nexata bajarapova Jesúsbana pexaejava toexanatsi.

*Pacuenia ayaibitsaëto jivi piavitanevi Jesús jamatejemayaexana yabara pelivaisi  
(Mt 8.16-17; Lc 4.40-41)*

<sup>32</sup> Itsa baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyajavajinavanapaevinua. <sup>33</sup> Daxita tomarapijivi Jesús pepatsibota baupajavaberena nacaetuata. <sup>34</sup> Nexata Jesús jamatejemayaexana ayaibitsaëto daxitacuenevitane pexainaevimi. Vecuacapitsapanua dovathi peyajavajinavana-paevi. Jesús apo tocopatsi dovathi pecuaicuajainexa jivijavabelia pevajunupaebiyaniavatsi. Tsipaji dovathi xaniavaetsia Jesús yapëtanetsi Dioso pexënatiocuene.

*Pacuenia Dioso pitorobilivaisi Jesús jivi tsipaeba Galilea nacuata yabara pelivaisi  
(Lc 4.42-44)*

<sup>35</sup> Pepo bajayacunua, abaxë itsa apo napetsi matacabí, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matacabí baja. <sup>36</sup> Itsa baja matacabí, Simónbana Jesús pëjaitaponalia. <sup>37</sup> Itsa baja bajarapamonae Jesús caxitaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

<sup>38</sup> Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

<sup>39</sup> Nexata daxita Galilea nacuajava Jesús jivi tispaeabpona Dioso pitorobilivaisi judíovi penacae-tuatabiabibonëjava. Jesús jivi dovathi vecuacapitsapaponanua.

*Pacuenia Jesús jamatejemayaexana bajayajebi  
bitso peperabëtsabanaenë yabara pelivaisi*

(Mt 8.1-4; Lc 5.12-16)

<sup>40</sup> Jesús imoxoyorenatsi bajayajebi bitso peperabëtsabanaenë. Nexata bajaraponë pematabacobëta nucajunua Jesús pitabarata. Bajaraponë pinijicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai peperabëtsabanaenë Jesúsjavabelia.

<sup>41</sup> Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jäjä, jitsipajë cajena. Jamatejemamë rabaja, jai Jesús peperabëtsabanaenëjavabelia.

<sup>42</sup> Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi. <sup>43</sup> Nexata baja Jesús naviatsiaexana bajaraponë. Pinijicuenia Jesús muxujioba bajaraponë penaviatsivajënaeya. Jesús jumaitsi:

**44** —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenebinëjavabelia. Nexata sacerdotenë cataena pecavecuaajibijava baja niavitanejavami. Diosonexa rasuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moisëspijinë nacitoroba. Nexata jivi yapëtaena pepacuene baja pecavecuaajibijava niavitanejavami, jai picani Jesús bajajajebi bitso peperabëtsabanaenëmijavabelia.

**45** Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaubitsaëtoxaneto pematatoyoronaeyanivatsi. Jesús saya ponapona tomaranë piajibijava. Itsiata cajena daxita nacuanëjavaverena jivi muxunapatabiabatsi Jesús.

## 2

*Pacuenia Jesús jamatejemayaexana petabusipacuenabinëtsiyabara pelivaisi  
(Mt 9.1-8; Lc 5.17-26)*

**1** Itsamatacabi icatsia Jesús naviarena Capernaum tomaraberena. Nexata jivi yapëtane pabota Jesús patajopa. **2** Nexata jivubitsaëtoxaneto nacaetuata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. **3** Nexata cuatro ponëbeje parena,

camayota peyavëtacaranajetarubenaevi petabusipacuenebinëtsi. <sup>4</sup> Nexata petabusipacuenabinëtsi acuenebi bajarapamonaec pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatujavavetsica vojoexana Jesús pecanacujitsatsica. Nexata bajarapavojotuatsica camayota yacopatsica petabusipacuenebinëtsi.

<sup>5</sup> Jesús jamatabëcueneyapëtane pacuenia bajarapamonaec sivanajamatabëxainatsi. “Nacatojamatejemayaexanaenatsi cajena,” pesivajamatabëjajavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeneconimi cavecuaajibiaexanatsi, jai Jesús.

<sup>6</sup> Bajarajota judíovi pecujarubiviyajuvënëvi naena. Bajarapamonaec itsa jumetaeyena bajarapacuenia Jesús pejumaitisijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

<sup>7</sup> —Maponëje Jesús Dioso apo pejitsipaecuenia cuaicuajai. Itsanë ata cajena apo caëjëpaetsi it-sajivi pibisiacuene pexanaeneconi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacuenia, jamatabëjai tse-nae bajarapamonaec.

<sup>8</sup> Jesús jamatabëcueneyapëtane bajarapamonaec jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivana-jamatabëxainame. Tsipaji cajena xanë necaëjëpa jivi pibisiacuene pexanaeneconimi tavecuaajibiaexanaenexa.<sup>9</sup> Paxamë apo pacacaëjëpae ata itsajivi pibisiacuene pexanaeneconi panevecuaajibiaexanaenexa, pacacaëjëpa picani saya jema panejumaitzinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitzijava. Itsita baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitzinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpaecuene panejamatejemayaexanaenexa, jai nexata Jesús judíovi pecujarubivijavabelia.

<sup>10</sup> Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, ma-panacuata necaëjëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecuneyapëtaenexamë tanecaëjëpaecuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

**11** —Xamë cajumaitsitsi. Nonotapunare. Nijacamayo pire. Nijaboyabelia baja ponare, jai Jesús.

**12** Nexata bajarapacuenia Jesús pejumaitsijavata petabusipacuenebinëmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuene, jamatabëcuenenabenajaquena. Bajarapamonae jumai tsenae mapacueniaje:

—Dioso cajena bitso ayajamatabëcuenenë. Caeto ata abaxë mapitsicuene pexanaejava apo taetsije, jai tsenae bajarapamonae.

*Pacuenia Jesús pijajivitonënexa junata Levívénënë yabara pelivaisi  
(Mt 9.9-13; Lc 5.27-32)*

**13** Jesús pona pucaxaneto itapajavabelia. Nexata jívi ayaibitsaëtoxaneto pënapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia.

**14** Bajaraxuacujinae penajetarucaejavata Jesús taeyeta Levívénënë, Alfeo pexënato. Leví eca pabota gobierno pejamatabëcuene jivijavabelia matamoyanijobabiaba impuestomatamo. Nexata Jesús jumaitsi Levíjavabelia:

—Leví, naxanitsia. Nepënaponare, jai Jesús.  
Jejai Leví. Nexata nonotapuna. Leví baja napona Jesús pepëta.

**15** Nexata Leví junata Jesús pebarënabaninexa pijabota. Nexata Leví pijabota Jesús pexaejava naxane. Leví pijabota ayaibitsaëto naena gobierno pejamatabëcuene jivijavabelia

impuestomatamo pematamoyanijobabiabivi. Itsamonaes ata nanabane pijamatabëcuenebejevi. Nexata Jesús pijajivi nabarëeca bajarapamonaejavata.<sup>16</sup> Nexata fariseovi, judíovi pecujarubivinua, Jesús taeyetatsi daxita bajarapamonaejavata pijajivi penabarënabanecaejava. Nexata bajarapamonaes jamatabëcuenenavëxaniabiaya jumaitsi Jesús pijajivijavabelia:

—Papecacujarubinë Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, pijamatabëcuenebejevijavatanua, naxaeyeca pexaejava, jai bajarapamonaes Jesús pijajivijavabelia.

<sup>17</sup> Itsa Jesús jumetane mapajumeje, nexata jumaitsi bajarapamonaejavabelia:

—Pevaëbinë raja apo vaëbi pejamatejemavi. Pevaëbinë raja piavitanevi vaëba. Bajara pijinia xanë ata itsinë. Apo sivapatajopaenë tajunatsinexa pamonaes baja aneconijibi tsavanapae. Sivapatatopajë raja tajunatsinexa pijaneconi pexainaevi. Bajarapamonaes junataponajë pecopabinexa pibisiacuene pexanaejava penajamatatabëcuenepënëyorotsinexa Diosojavabelia, jai Jesús bajarapamonaejavabelia.

*Pacuenia Jesús yanijobatsi pamatacabibeje  
jivi vajëtapona Diosojavabelia pexaejava apo  
pexaeyabiabixae yabara pelivaisi  
(Mt 9.14-17; Lc 5.33-39)*

<sup>18</sup> Itsamatacabí Juan pijajivi, fariseovi pijajivinua, pexaejava apo xaevanapae pamatacabibeje Diosojavabelia vajëcapona. Nexata itsamonaes

Jesúsjavaberena pata. Yanijobatsi pexaejava piatsobicuene yabara. Jumaitsi mapacueniaje:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëtapona. ¿Detsa xuajitsia itsiata xamë nijajivi pexaejava xaeyabiaba pamatacabibeje Diosojavabelia vajëtapona? jai Jesús peyanijobivitsi.

<sup>19</sup> Nexata Jesús jumaitsi bajarapamonaejavabelia:

—Pamonae junatatsi penacasabifiestajavabelia penanabaninexa, apo atsobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae.

<sup>20</sup> Itsiata baitsi jane itsa pejananacasabinë tsimaxëpatsipatsi pevecuacaponaenexatsi itsjavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaexaetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtapona. Itsiata pamatacabí xanë necaponaena bajarapamonaevecua, nexata jane baja bajarapamatocabi pexaejava apo xae tsane bitso tanesivanajamatabëxainaexae, jai Jesús peyanijobivitsijavabelia.

<sup>21</sup> Nexata bajarapamonae perujujamatabëcuene baja pecopabinexa, Jesús livaisi tsipaeba comparacióncuenia bajarapamonae pejume-covënëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva perujujamatabëcuene baja pecopabinexa, Jesús livaisi tsipaeba

comparacióncuenia. Perujujamatatabëcuene yabara Jesús jumaitsi bajarapamonaejavabelia mapacueniae:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. <sup>22</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëx abaxë xaina. Nexata itsa yatititibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanjobivitsijavabelia bajarapamonaejumecovënëtsinexa ëpejanalivaisi, Jesús petsipaebilivaisi, perujujamatatabëcuene baja penacopabinexa.

*Pacuenia Jesús pijajivi namutua siricanajetarubena trigoxu penacueraevetsimatacabita yabara pelivaisi*

*(Mt 12.1-8; Lc 6.1-5)*

<sup>23</sup> Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoxu siricanajetarubena. Xuxaeyabuatapona.

<sup>24</sup> Nexata fariseovi jumaitsi Jesúsjavabelia:

—¡Taema mapacueneje! Dioso Moiséspijinëta penajumecopatsilivaisita vajanacaitavetsicuene, njajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, njajivi apo bexanae mapacueneje, jai fariseovi Jesúsjavabelia.

**25** Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimë tsipaji Dioso pejumelivaisibaxuto paneyapétaenexa pacuenia vajasalinainëmi Davidpijinë, pebaréponaponaevi yajava, exana pamatacabí bitso piajani? **26** Davidpijinë joneya Dioso pijatemploboyalia pamatacabí Abiatarpijinë daxita sacerdotevi penamatacitorobinë tsaponaponae. Nexata Dioso pijatemploboënëta, mesajumata, bobena Diosonexa ofrendacuenia petojebibpanbëanë. Bajarapapanbëanë itsajivi ata apo tocopatsitsi pexaenexa penaneconitsiyanova Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanbëanë pijajivi barë, itsiata apo vénanananeconitsi Diosojavabelia, jai Jesús fariseovijavabelia.

**27** Icatsia Jesús jumaitsi fariseovijavabelia:

—Dioso raja tocopata caematacabí jivi penacueraevetsinexa. Tsipaji Dioso yapétane pacuenia jivi namatavenona penacueraevetsinexa. Dioso apo exanae jivi saya jema peyaiyataenexa penacueraevetsimatacabianë. **28** Nexata xanë, Daxitajivi Pematapijinënë, netoxanepana

cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

### 3

*Pacuenia Jesús jamatejemayaexana pebi pecobetsaquenaenë yabara pelivaisi  
(Mt 12.9-14; Lc 6.6-11)*

<sup>1</sup> Penacueraevetsimatacabita Jesús joneya judíovi penacaetuabiabiboyalia. Nexata bajarajota pebi naeca pecobetsaquenaenë. <sup>2</sup> Nexata Jesús naitaxutocaevetatsi fariseovi petaenexatsi pecobetsaquenaenë pejamatejemayaexanaejava penacueraevetsimatacabita. Nexata Jesús pecobetsaquenaenë itsa jamatejemayaexana penacueraevetsimatacabita, “Jesús raja nanconita Diosojavabelia. Tsipaji penacueraevetsimatacabita nacueneba,” pejainexa bajarapamona. <sup>3</sup> Nexata Jesús jumaitsi pecobetsaquenaenëjavabelia:

—Nonotapunare. Nucare mapamona pitabarataje, jai.

<sup>4</sup> Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vaja-jamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi.

<sup>5</sup> Nexata Jesús anaeya naëcota bajarapamona. Bajaraxuacujinae Jesús bejamatabëjiobireca. Tsipaji yapëtane piajamatabëcuenetajajava

fariseovi. Nexata Jesús jumaitsi pecobetsaque-naenëjavabelia:

—Namaxërovire, jai.

Nexata pecobetsaquenaenë namaxërovita. Bajarajota cobexanepananajereca baja. Pecobetsaquenaenëjavami ajibi. <sup>6</sup> Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata bajarapabovetua pitsapa. Pona penabarëcuaicuajainexa nacuaevetsinë Herodes pijajivijavabelia. Bajarapamonae najumejaita Jesús pebeyaxuabinexatsi.

*Pacuenia jivi nacaetuata Galilea pucaxaneto itapata yabara pelivaisi*

<sup>7</sup> Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaëtoxaneto Galilea nacuapijivi. <sup>8</sup> Nexata Jesús pënaponaliatsi Judea nacuapijivinua, Jerusalén tomariapijivinua, Idumea nacuapijivinua, Jordánmene itsapanaverenapijivinua, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonae Jesús pënaponaliatsi tsipaji Jesús vënélivaisitanetsi Dioso pesaëta pinijicuene pexanaponaejava. <sup>9</sup> Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaëtoxaneto Jesús bitso matacënënaponatsi, nexata bajarapamo ënëabereca Jesús perunaenexareca. <sup>10</sup> Jesús baja ayaibitsaëto piavitanevi jamatejemayaexana. Bajaraxuata itsamonae, piavitanevi, Jesúsjavabelia natorotaponabiaba pejayatsinexatsi.

**11** Dovathi peyajavajinavanapaevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aejai tsabiabi.

—Xamë tsaena Dioso pexenatomë, jai tsabiabi dovathi peyajavajinavanapaevi.

**12** Nexata Jesús jumeitaveta bajarapamonae. Jumaitsi:

—“Dioso raja pexenato,” pajamë pëtsa xanë yabara itsajivijavabelia, jai Jesús bajarapamonaejavabelia.

*Pacuenia Jesús pijajivi ayaubitsaëtoyanetoyajuvënëvi itapeta saya doce ponëbeje apóstolevinexa yabara pelivaisi*

(Mt 10.1-4; Lc 6.12-16)

**13** Jesús pijajivi ayaubitsaëtoyanetoyajuvënëvi, doce saya ponëbeje, itapeta apóstolevinexa. Jesús pitapetsivajënae apóstolevinexa, junaya petsutojumabetsia. Bajaravetsica Jesús jumatanuca ponëbeje jamatabëitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia.

**14** Nexata Jesús caetuata caebitsaëtoyo, doce ponëbeje pijajivi, pepënajinavanapaevinexatsi. Jesús itorobijitsianua bajarapamonae daxitanacuanëjava jivi petsipaebanajetarubenaenexa Dioso pitorobilivaisi. **15** Jesús pijajivi jamatabëcuñecaëjëpaeyaexana Dioso pesaëta pejamatejemayaexanaponaenexa piavitanevi. Jamatabëcuñecaëjëpaeyaexananua Dioso pesaëta dovathi jivi pevecuacapitsapaponaenexa. **16** Jesús pijapóstolevi, doce ponëbeje, mapevënëanëje. Copiaya ponë pevënë Simón. Bajaraponë

Jesús vënéruba itsavënë, Pedro. <sup>17</sup> Itsanë Santiago. Itsanë Juan. Santiagobeje Juanbeje nacaebananëbeje, Zebedeo pexénatobeje. Bajaraponëbeje Jesús vënéruba Boanerges. "Boanerges," itsa jai, bajarapamonae pijajumeta mapajumetaje pejumaitsijume: "Yamaxë pexénatobeje," pejajume. <sup>18</sup> Itsanë pevënë Andrés. Itsanë Felipe. Itsanë Bartolomé. Itsanë Mateo. Itsanë Tomás. Itsanë Santiago, Alfeo pexénato. Itsanë Tadeo. Itsanë Simón, celotenë. <sup>19</sup> Itsanë Judas Iscariote. Bajaraponë bexéajavabelia Jesús canajetsiitsatsi pijavajabitsaë pecobeyabelia pebeyaxuabinexatsi.

*Pacuenia itsamonaे Jesúс yabara jamatabécuenenavëxaniabiaya jumaitsi: "Beelzebú raja pesaëta, Jesúс dovathi jivivecua capitalsapapona," jai yabara pelivaisi*

(Mt 12.22-32; Lc 11.14-23; 12.10)

<sup>20</sup> Jesúс boyá joneya pijajivi yajava. Icatsia jivibitsaëtoxaneto nacaetuata. Nexata acuenebi Jesúс pijajivi pebarënabanijava. <sup>21</sup> Itsamonaе Jesúс yabara jumaitsi: "Jesúс raja matajemabatsi," jai. Nexata bajarapacuenia itsamonaе Jesúс yabara pejumaitsijava, Jesúс pijamonaе vënélivaisitanetsi. Nexata Jesúс pijamonaе ponarena Jesúсjavaberena pebarëponaenexatsilia picani.

<sup>22</sup> Judíovi pecujarubivi, Jerusalén tomaraver- ena peponaevi, jamatabécuenenavëxaniabiaya Jesúс yabara jumaitsi:

—Mara ponë Jesúсje, Beelzebú yajavaponapona. Beelzebú raja daxita dovathivi pevetsinë. Bajaraxuata Jesúс Beelzebú pesaëta dovathi jivive-

cua capitsappona, jai judíovi pecujarubivi jamatabëcuenenavëxaniabiaya Jesús yabara.

<sup>23</sup> Nexata Jesús junata bajarapamonae jamatabëcuenenavëxaniabiaya pejumaitsijava pecanaëjëtsinexa. Nexata bajarapamonaejavelia Jesús jumaitsi mapacueniaje:

—Beelzebú raja dovathivi jivivecua apo capitsapponae tsipae. Tsipaji Beelzebú dovathi jivivecua itsa capitsapponaejitsipa, nexata Beelzebú bepijavajabitsaë taejitsipa pijajivi. <sup>24</sup> Pacanaëjëre mapacueneje. Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. <sup>25</sup> Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. <sup>26</sup> Bajara pijinia itsipae dovathi ata. Dovathi jivivecua itsa capitsapponaejitsipa pijajivi dovathivi, nexata bepijavajabitsaënen taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

<sup>27</sup> Bajarapamonaecanäjëtsinexa Jesús bitso piasaënëcuene dovathi matatoxenetsia, Jesús icat-sia jumaitsi bajarapamonaejavelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyalia peyacajérëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi.

Taxucëtabuatsipatsi yajava. Matapania bajara-pacuenia yacajérëtsipatsi daxita xua xaina pijabota. Bajara pijinia pacuenia xané ata bitso tasaënë dovathi matatoxenetsia. Bajaraxuata necaëjëpa jivivecua tacapitsapaenexa dovathivi.

<sup>28</sup> Xaniajané pacuenia pacatsipaebatsi. Dioso cajena caëjëpatsi daxitajivi pibisiacuene pexanaeneconi pevecuaajibiaexanaenexa. Pibisiacuenia jivi Dioso baracuaicuajai ata, bajarapanconci ata Dioso caëjëpatsi pevecuaajibiaexanaenexa. <sup>29</sup> Itsiata baitsi jane pajivi pibisiacuenia baracuaicuajai Espíritu Santo, bajarapajivi Dioso apo vecuaajibiaexanae tsane bajarapanconci. Bajarapajivi naneconitsiana daxita matacabijavabelianexa, jai Jesús bajarapamonaejavabelia.

<sup>30</sup> Bajarapacuenia Jesús jumaitsi tsipaji Jesús Espíritu Santo yajavaponapone atatsi, judíovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espíritu Santojavabelia.

*Pacuenia Jesús pejuyapijivi, pena yajava,  
nubena bojumavelia yabara pelivaisi*

*(Mt 12.46-50; Lc 8.19-21)*

<sup>31</sup> Jesús pejuyapijivi, pena yajava, pata Jesúsjavaberena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. <sup>32</sup> Nexata pamonae Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

<sup>33</sup> Nexata Jesús jumaitsi bajarapamonaejavabelia:

—¿Detsa pitsijamatabëcuenevi taena, tajuyapijivinua? jai Jesús.

<sup>34</sup> Bajaraxuacujinae Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamonae xanëjavata penaevije, bajarapamonae jane taenajivi, tajuyapijivinua.

<sup>35</sup> Tcipaji raja pamonae exana pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

## 4

*Pacuenia Jesús jivi livaisi tsipaeba peubinë pelivaisicuenia yabara pelivaisi*

*(Mt 13.1-9; Lc 8.4-8)*

<sup>1</sup> Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoxaneto nacaetuata itsajota Jesús livaisi tsipaebanuca. Nexata Jesús runareca jera ënëabereca. Ecareca jera ënëtareca. Daxita jivubitsaëtoxaneto tajetabovelia nubena. <sup>2</sup> Nexata Jesús daxitacuene livaisianë tsipaeba jivijavabelia. Jesús jumai tsaponaе bajarapamonaejavabelia mapacueniae:

<sup>3</sup> —Panenamuxunaevere mapalivaisije. Peubinë ponu pabiabelia peubinexa. Nexata itsa pata pabita, peubixu pexucayabajarabicuenia

ubanajetaruca. <sup>4</sup> Nexata pexucayabajabara-bijavata itsaxu othopa pabi tuatuajéjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. <sup>5</sup> Itsaxu pijinia othopa ibopananëjumata, itsajota bitso ira apo aitayaë. <sup>6</sup> Nexata icotia bitso itsa ataju, nexata bajarapaxu juvi ata, tsaquenaponia. Tsipaji irabereca bitso apo atabunepepiareca. <sup>7</sup> Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënénatsi peubijavami. Nexata peubijava apo xainae pecuai. <sup>8</sup> Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonë capitsapa treinta paxutobeje tsaponae. Itsabotonë capitsapa sesenta paxutobeje tsaponae. Itsabotonë capitsapa cien paxutobeje tsaponae, jai Jesús bajarapalivaisi petsipaebivijavabelia.

<sup>9</sup> Nexata icatsia Jesús jumaitsi jivibitsaëtoxanetojavabelia:

—Pajivi jamatabënejumeyapëtane patacatsipae-bilivaisi, nemamuxunaevetsi xaniavaetsia, jai Jesús.

*Pacuene yabara Jesús jivijavabelia livaisi tispaeba ècomparacióncuenia yabara pelivaisi  
(Mt 13.10-17; Lc 8.9-10)*

<sup>10</sup> Jesús livaisi petsipaebicujinae, jivibitsaëtoxaneto baja Jesús vecuanaviabatsi. Nexata Jesús pijaeprato barëncopata doce ponëbeje pijajivi, itsamonaes itsiata yajava.

Nexata bajarapamona Jesús yanijobatsi.  
Bajarapamona jumaitsi Jesúsvababelia:

—Palivaisi jivijavabelia tsipaebame peubinë pelivaisicuenia, pajamatatabëcuene xaina, patayapëtaenexa panetsipaebare, jai bajarapamona Jesúsvababelia.

<sup>11</sup> Nexata Jesús jumaitsi bajarapamonaejavelia:

—Paxamë rabaja xaniavaetsia Dioso pacayapëtaeyaelana Dioso papijajivimë papceaevetsijava. Bajarapacuene abaxë daxitajivi apo yapëtae. Baitsi ra saicaya pamona apo tajajivi, tsipaebajë livaisianë écomparacióncuenia.

<sup>12</sup> Bajaraxuata nexata bajarapamona tae ata Dioso pesaëta pinijicuene taexanaejava, itsiata apo yapëtae pajamatatabëcuene yabara exanajë pinijicuene taexanaejava. Nenamuxunaevetsi ata tatsipaebilivaisi, itsiata apo jumeyapëtae pajamatatabëcuene xaina tatsipaebilivaisi. Bajarapacuenia apo jumeyapëtae penajamatatabëcuene copatsiyaniwa Diosojavabelia pibisiacuene pexanaeneconimi Dioso pevecuaajibiaexanaeyanivatsi, jai Jesús.

*Pacuenia Jesús yapëtaeyaelana pijajivi, itsamona yajava, pajamatatabëcuene xaina palivaisi tsipaeba peubinë pelivaisicuenia yabara pelivaisi*

(Mt 13.18-23; Lc 8.11-15)

<sup>13</sup> Jesús icatsia jumaitsi pijajivijavabelia:

—Itsa apo pajumeyapëtaemë pajamatatabëcuene xaina palivaisi pacatsipaebatsi peubinë pelivaisicuenia, ¿detsa nexata pacuenia pajumeyapëtaename daxita palivaisianë

pacatsipaebijitsiatsi comparacióncuenia? jai Jesúš pijajivijavabelia.

<sup>14</sup> Nexata icatsia Jesúš jumaitsi pijajivijavabelia pijajivi peyapétaenexa pajamatabëcuene xaina palivaisi tsipaeba peubinë pelivaisicuenia:

—Pajivi raja peubixu uba, bajarapajivi bepepaebinë Dioso pitorobilivaisi. <sup>15</sup> Pacuenia itsi pabita peubixu, paxu othopa pabi tuatuajéjava penajetarucaenamutojumata, bajara tsijamatabëcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, dovathi vecuapitatsi bajarapalivaisimi, petsijamatabëubilivaisimitsi. <sup>16</sup> Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barëyaya jumecovënëta. <sup>17</sup> Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëéthétovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi,

itsa yalivaisibatsinua Dioso pitorobilivaisi yabara, nexata pejumecovënëtsijavami bajarapalivaisi bepijia copaba. Pevajënaeyabelia apo jumecovënëtavanapae. <sup>18</sup> Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonaes Dioso pitorobilivaisi. Jumetane picani bajarapamonae Dioso pitorobilivaisi. <sup>19</sup> Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitsabitsi pejamatabëëthëtotä. Nexata pacuenia itsi pabita piacuajibibotonë, bajara itsi bajarapamonae. Tsipaji Dioso xaniavaetsia apo tojinavanapae. <sup>20</sup> Pacuenia pijinia itsi paxu othopa pexaniairata, bajara tsijamatabëcueneitsitsi itsamonaes Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabëjunuatsi. Nexata tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë treinta paxutobeje tsaponae, itsabotonë sesenta paxutobeje tsaponae, itsabotonë cien paxutobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia Jesús pijajivi livaisi tsipaeba lámparabë pelivaisicuenia yabara pelivaisi  
(Lc 8.16-18)*

<sup>21</sup> Jesús icatsia jumaitsi doce ponëbeje pijajivi-javabelia, itsamonaejavabelia ata:

—Itsajivi ata lámparabë pitanojotsicujinae apetsi cajoniënëalia. Apo etsi cama bëxëpanalia ata. Jume baja cajena. Biji rajane athëbëyo etsia daxitaboënë pitayotecaenexa. <sup>22</sup> Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumemataysia apo tsipaebaponaenë. Itsamona nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë. <sup>23</sup> Pajivi jamatabënejumeyapëtane patacatsipaebilivaisi, xaniavaetsia nemamuxunaevetsi, jai Jesús pijajivijavabelia.

<sup>24</sup> Icatsia Jesús jumaitsi bajarapamonaejavabelia:

—Panejumecanaëjëre patacatsipaebilivaisi. Itsamona ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. <sup>25</sup> Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

*Pacuenia peubixu pejuvicujinae, Dioso pesaëta  
vitsaba yabara pelivaisi*

<sup>26</sup> Jesùs icatsia jivi comparacióncuenia livaisi tsipaeba Dioso pijajivi pevetsicuene yabara. Jumaitsi mapacueniae:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanajetaruca. <sup>27</sup> Peubinë peubicujinae vemaxëmajitabiaba meravi canacujitsia. Naëcotabiaba matacabita. Bajarapacuenia panepapona matacabianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva. <sup>28</sup> Ira raja pejamatabëcueneta naxaniba peubijava. Copiata pepaboto vitsabaya. Xuacujinae namatonota. Xuacujinae cuainavereta. <sup>29</sup> Itsa baja yaniona peubijava, penotsivi pona penotsinexa. Tcipaji baja penotsimatacabinexa tocopiapatatsi, jai Jesùs jivijavabelia.

*Pacuenia mostazaxutoyo pejuvicujinae,  
mostazanae bepijia vitsaba yabara pelivaisi*

(Mt 13.31-32; Lc 13.18-19)

<sup>30-31</sup> Jesùs icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepijia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepijia vitsaba mostazanae, bajara

pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Mostazaxuraja bitso tsiquirixutoxi daxita peubixuvecua. <sup>32</sup> Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pematapenanë exana mostazanaemaxërananëjavata. Bajara pijinia itsane jivi ata. Bepijia ayaibitsaëto Dioso pijajivi naexanaena,” janë meta tsane mapacueniae, jai Jesús pijajivijavabelia, itsamonaejavabelia ata.

*Pacuenia Jesús jivi livaisi tsipaebabiaba  
ëcomparacióncuenia yabara pelivaisi  
(Mt 13.34-35)*

<sup>33</sup> Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba écomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. <sup>34</sup> Jesús écomparacióncuenia livaisi tsipaebabiaba bajarapamonaejavabelia. Itsiata saicaya Jesús épíjajivijavabelia xaniavaetsia yapëtaeyaxanabiaba pajamatabëcuene xaina daxita bajarapalivaisianë.

*Pacuenia Jesús itaveta joviboxaneto, malataca  
yajava, piayajavami yabara pelivaisi  
(Mt 8.23-27; Lc 8.22-25)*

<sup>35</sup> Dioso pitorobilivaisi Jesús tsipaeba jivijavabelia. Bajarapamatocabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeli-aje, jai Jesús.

<sup>36</sup> Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pēnaponatsi itsajeranëta. <sup>37</sup> Nexata pinijijoviboxaneto jemata najetaruca. Nexata malataca jera ènëaberena mera epabajarabapona. Nexata baja jera ènëaberena mera vénëcapona. <sup>38</sup> Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabiabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopae-natsi! ¿Apo jamatabëcuenebëjamë tsaja? jai Jesús pijajivi.

<sup>39</sup> Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. <sup>40</sup> Nexata Jesús jumaitsi pijajivi-javabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

<sup>41</sup> Nexata Jesús pijajivi najunaviaca bajara-pacuene petaexae. Épamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

## 5

*Pacuenia pebi, dovathivi peyajavaponapon-aenë, Jesús vecuacapitsapa Gerasa nacuata yabara pelivaisi*

(Mt 8.28-34; Lc 8.26-39)

<sup>1</sup> Jesús pijajivi barëpata pucaxaneto itsapanabelia, Gerasa nacuayabelia. <sup>2</sup> Nexata Jesús jerajavavetsina nonotajuna. Pebi dovathivi peyajavaponapon-aenë, cujitarabarenatsi jivimëthëanëjavaverena. <sup>3</sup> Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. <sup>4</sup> Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesäëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomì tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. <sup>5</sup> Bajaraponë petsutonëjava, jivi petëpaevi pemëthëcaejava, matacabijebi, meravijebi yajava, ponaponabiaba. Vavajai tsabiabaponaponae. Ibotonëjavabelia natsaquibajarababiabaponaponae. <sup>6</sup> Bajaraponë itsa taetaba Jesús penajetarucaejava, nexata tajëverena cujinaeponarena Jesúsjavaberena. Jesús pitabarata pematabacabëta nucajunua. <sup>7</sup> Bajaraponë aëjai pinijijumeta Jesús pitabarata.

—Jesús, pepo Dioso, athëbëtatsia peecaenë, pexënatomë. ¿Detsa xua jaitame xanëjavaberena? Pexaniacuene bitso cavajëtatsi Dioso pitabarata.

Nejamatabëcuenebejiobitsipame, jai dovathivi peyajavaponaponaenë Jesúsjavabelia.

<sup>8</sup> Bajarapacuenia jumaitsi dovathivi peyajavaponaponaenë tsipaji Jesúš jerajavavetsina penonotajunaejavata, dovathivi peyajavaponaponaenë pemataenenaejavatatsi, Jesúš itaveta dovathivi. Jesúš jumaitsi dovathivijavabelia mapacueniaje:

—¡Dovathivi, bajaraponë baja pavecuapitsapare! jai Jesúš.

<sup>9</sup> Nexata Jesúš jumaitsi bajaraponëjavabelia:

—¿Detsa pavënëmë? jai.

Nexata dovathivi peyajavaponaponaenë navënëpaeba.

—Tavënë raja Legióñ. Tsipaji raja bitso paayaibitsaëtoxanetonë, jai dovathivi peyajavaponaponaenë.

<sup>10</sup> Nexata dovathivi pinijicuenia vajëta Jesúsjavabelia itsairabelia pejutsiyanivatsi bajarapairavecua. <sup>11</sup> Nexata bajarajota, imoxoyo petsutojavata, marranobitsaëtoxaneto xaevanapa.

<sup>12</sup> Dovathivi bitso vajëca Jesúsjavabelia.

—Paneitorobare marranobitsaëtoxanetojavabelia. Panetocopare patajonenexa bajara pamarranobitsaëtoxanetojavabelia, jai dovathivi.

<sup>13</sup> Nexata Jesúš tocopata pacuenia dovathivi vajëcatsi. Dovathivi baja pebi vecuapitsapecatsi. Nexata baja marranobitsaëtoxanetojavabelia dovathivi junua. Bajara pamarranobitsaëtoxaneto jinavanapa anijamilbeje ponëbeje. Nexata daxita marranobitsaëtoxanetomi cujinaeyeca.

Pucaxaneto itapajanituareca othopareca. Nexata daxita marranobitsaëtoxanetomi meneta bubuna.

<sup>14</sup> Bajara pamarranobitsaëtoxanetomi pevetavanapaevi rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penae-vijavabelia ata. Nexata jivi ponarena petaenexa bajarapacuene. <sup>15</sup> Nexata dovathivi peyajavaponaponaenëmi bajarapamonae taeyeta Jesús pemuxuneneta. Bajaraponë penaxatatsijava baja naxatateca. Jamatejema baja. Xaniavaetsia eca. Nexata bajarapamonae cujunavatsi Jesús. <sup>16</sup> Pamonaе cuenetanetsi Jesús pejamatejemayaexanaejava dovathivi peyajavaponaponaenëmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaëtoxanetojavabelia. <sup>17</sup> Nexata Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cujunavatsi.

<sup>18</sup> Jesús baja itsa runareca jera ënëabereca, ponë dovathivi peyajavaponaponaenëmi, bitso picani navajëca Jesús pepëta penaponaenexa. <sup>19</sup> Itsiata Jesús apo jejai. Jumaitsi bajaraponëjavabelia:

—Ponare nijaboyabelia. Nijamonaе tsipae-bare papinijicuene Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenëmijavabelia.

<sup>20</sup> Nexata baja dovathivi peyajavaponaponaenëmi pona. Taxuxuaba penavajunupaebijava papinijicuene Jesús exanatsi. Bajaraponë

navajunupaebapona Decápolisvënë nacuajava. Decápolisvënë nacuata eca diez patomarabeje. Daxitajivi jamatabécuenenabenajaca itsa jumetanetsi bajaraponë penavajunupaebaponaejava.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaéyaexana Jairo pexénatovayo, petépaevayomi, yabara pelívaishi*

(Mt 9.18-26; Lc 8.40-56)

**21** Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxaneto Jesús matatoyoronatsi. **22** Nexata bajarajota napatajopa Jairovénënë. Bajaraponë judíovi penacaetuabiabibo pevetsiviyajuvénënë. Jairo itsa taetaba Jesús, nexata Jairo pematabacabëta yaiyataeya Jesús pitabarata nucajunua. **23** Pinijicuenia Jairo vajéta Jesúsjavabelia. Jumaitsi:

—Taxénatoyo raja netobitso. Najumalipeneta rabaja petépaenexa. Pexaniacuene netoexanare. Naxanitsia. Netoperabëjayatsianame necobeta petépaeyaniva, jai Jairo.

**24** Jejai Jesús. Jesús nexata napona Jairo pepëta. Nexata jivibitsaëtoxaneto Jesús pepénaponaevitsi matatoyorotsia cënénanajetarubenatsi.

**25** Bajarapajivibitsaëtoxaneto tuatuajëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. **26** Bitsó nexata bajarapova bejiobi pexainaecuene yabara pevaëbivitsi pejamatabécueneta. Tsipaji belia

daxita pexainaejaxaximi navecuavereta pemamatamobaponaeta pevaëbivitsi. Itsiata apo caevi piavitanecuene. Biji caranata pevajënaeyabelia capunaponatsi piavitanecuene.

<sup>27</sup> Nexata bajarapova jumetane itsamona pecuaicuajaijava Jesùs piavitanevi pejamatejemayaexanaponaejava yabara. Nexata bajarapova ponataba Jesùs pepënëvelia, jivibitsaëtoxaneto tuatuajëalia. Nexata bajarapova tojayataba Jesùs penaxatatsijava.

<sup>28</sup> Tsipaji cajena bajarapova jamatabëjumaitsi: “Itsa Jesùs penaxatatsijava tojayatabianajë, tavitanejavami nevecuaajibi tsane,” jamatabëjai.

<sup>29</sup> Nexata bajarapova itsa tojayataba Jesùs penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaeijavareca, nayapëtane.

<sup>30</sup> Jesùs ata nayapëtane pesaëta pejamatejemayaexanaejava pepënëyabelia. Nexata pejyatabajavatatsi Jesùs napënëyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

<sup>31</sup> Nexata Jesùs pijajivi jumaitsitsi:

—Taneme rabaja jivibitsaëtoxaneto pecacënënanajetarubenaejava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesùs pijajivi.

<sup>32</sup> Jesùs naëcobaruta daxitajivijava petaenexa pajivi tojayatabatsi penaxatatsijava.

<sup>33</sup> Nexata bajarapova neconeojai tsanucae pecajunavi penayapëtaexae Jesùs pejamatejemayaexanaejavatatsi. Nexata bajarapova najetabarena Jesùs

pitabarayaberena. Pematabacabëta nucajunua. Nexata daxita pacuene exana, bajarapova tsipaeba Jesúsjavabelia. <sup>34</sup> Nexata Jesús jumaitsi bajarapovajavabelia:

—Xamë nesivajamatatabëjumaitsimë: “Jesús penaxatatsijava itsa tojayatabianajë, tavitanejavami nevecuaajibi tsane,” nesivajamatatabëjamë. Bajaraxuata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

<sup>35</sup> Bajarapacuenia Jesús pejumaitsanucaejavata namutoepatota, Jairo pijaboverena peponaevi mataenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

<sup>36</sup> Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatatabëxainame. Njamatabëcuenecopare saya ëxanëjavaberena nexënatovayo pecatoasaënexa, jai Jesús Jairojavabelia.

<sup>37</sup> Nexata Jesús, pajivibitsaëtoxaneto pënajanjetarubenatsi, pueneta bajarajota. Jesús pona Jairo pijaboyabelia. Jesús saya yajavalia mapamatatabëxéyoje: Pedro, Juan, Santiago, Jairo Jane baja. Juanbeje Santiagobeje nacaebananëbeje.

<sup>38</sup> Itsa baja Jesús palia Jairo pijaboyabelia, tane jivibitsaëto pinijijumeta pematanueyabijava petëpaevayo. <sup>39</sup> Jesús itsa joneya boyalia, jumaitsi bajarapamonaejavabelia:

—Pëtsa bitso pamatanueyabame. Pejanava raja apo tēpae. Saya raja majitanuca, jai Jesús tsipají yapétane Jesús piasaéyaexanaejavanexa bajara-povayo.

<sup>40</sup> Bajarapacuenia Jesús pejumaitsijava, bajarapamonae saya jumecapocaponatsi. Nexata daxita Jesús bovecua pitsapaeyaexana. Itsaxuayolia petépaevayo boca, Jesús barëjoneya caejiviyobeje saya. Jesús saya barëjoneya mapamatatabëxëyo: petépaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya. <sup>41</sup> Nexata Jesús petépaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsijume: “Pejanava, nonotapunare,” pejajume.

<sup>42</sup> Bajarapacuenia Jesús pejumaitsijavata, pejanavayo nonotabapuna. Ponapona baja. Bajarapovayo doce pavaibeje xaina. Nexata Jesús peyajavajonevilia pinijicuenia jamatabëcuenenabenajaca bajarapacuene itsa tane. <sup>43</sup> Nexata Jesús pinijicuenia jumaitsi:

—Pëtsa itsajivi ata patsipaebame mapacueneje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënativoyo pexaejava rajure, jai.

## 6

*Pacuenia Jesús naviata pijanacuayabelia,  
Nazaret tomarabelia, yabara pelivaisi*

*(Mt 13.53-58; Lc 4.16-30)*

<sup>1</sup> Jesús baja, pijajivi yajava, pona Capernaum tomaravecua. Naviata pijanacuayabelia,

pevitsabitomarabelia. <sup>2</sup> Judíovi penacuer-aevertsimatacabita Jesús taxuxuaba jivi livaisi petsipaebijava judíovi penacaetuatabiabibota. Ayaubitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcuenaebiatanetsi. Bajarapamonae Jesús yabara najumaitsi mapacueniae:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacueneje? ¡Pitsipinijicuene maponë exanaje, vaxaitsti abaxë caeto ata apo taetsi! ¡Matapania matanetsije! <sup>3</sup> Maponëje vaxait-siyajuvënénë. Carpenteronë. María pexënato. Bajaraponë pejuyapijivi Santiago, José, Judas, Simón. Papetiriavi ata vajatomarata jinavanapa, bajaraponë pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. <sup>4</sup> Nexata Jesús jumaitsi bajarapamonaejavelia:

—Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijaviriavi, pijamonae ata, apo yaiyataeyabiabtsi, jai Jesús.

<sup>5</sup> Nexata Jesús bajarajota jivi ayaubitsaëtojavabelia pinijicuene pexanaejava apo tsitaexanae. Tsipaji apo jumecovënëtsitsi. Saya caejiviyobeje piavitanevi pecobeta jayata. Jamatejemaya exana. <sup>6</sup> Nexata Jesús bitso najamatabëxaina. Tsipaji jivi apo jumecovënëtsitsi. Bajaraxuacujinae Jesús tsiquiritomaraxijava Dioso pitorobilivaisi jivi tsipaebanajetaruca.

*Pacuenia Jesú斯 pijajivi itoroba Dioso pitorobili-  
vaisi jívi petsipaebanajetarubenaenexa yabara pe-  
livaisi*

(Mt 10.5-15; Lc 9.1-6)

<sup>7</sup> Jesú斯 junata pijajivi doce ponëbeje penacaetusinexa. Nexata Jesú斯 pijajivi itoroba anijanëbeje tsaponae. Jesú斯 pijajivi pecaejëpaejamatabëcuensjamatabëcuenscaejëpaeyaexana dovathi peyajavajinavanapaevi pevecuacapitsapaponanexa.

<sup>8</sup> Jesú斯 jane baja pijajivi penaropobivajënae, Jesú斯 jumaitsi pijajivijavabelia mapacueniaje:

—Pëtsa itsacuenejava ata pacaponame panijanamutonexa. Pëtsa pacaponame panemarue ata, doro ata, palata ata. Énaeboyo saya pacaponare. <sup>9</sup> Itsiata pataxunaponare panenataxuxatabijava. Caejava panenaxatatsijava pajumaponare. Pëtsa anijacamisabeje pacaponame. <sup>10</sup> Itsajota papatabiabianame, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaename, bajara-pabovecuapitsapaenname. <sup>11</sup> Patomarata apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, nexata paponaename bajarapatomaravecua. Paneponaevajënae bajarapatomarata panataxuatsapërévarëbianame. Bajarapacuenia itsa panataxuatsapërévarëbianame, bajara-patomarapijivi yapëtaena Diosojavabelia penaneconitsicuene apo papecacopiapitsixaepapecanamuxunaevetsinexa panetsipaebilivaisi. Xaniajanë pacuenia pacatsipaebijitsiatsi. Pamatacabí Dioso jívi naneconitsiaex-

anaena, bajarapamatacabi Dioso bitso naneconitsiaexanaenatsi patomarapijivi apo pacacopiapitsi tsane. Paneconivajétota bajayata Dioso nanecónitsiaexana Sodoma tomarapijivimi, Gomorra tomarapijivimi ata, bajarapanecónivajéto matatoxenetsia Dioso naneconitsiaexanaenatsi patomarapijivi apo pacacopiapitsi tsane, jai Jesús pijajivijavabelia.

**12** Nexata jane baja Jesús pijajivi naropoba Dioso pitorobilivaisi jivi petsipaebanajetarubenaenexa. Jesús pijajivi naropoba anijanëbeje tsaponae. Nexata Jesús pijajivi jumai tsaponae jivijavabelia:

—Pacopabare baja pibisiacuene paneexanabiabijava. Panajamatabécuenepénëyorore Diosojavabelia, jai tsaponae.

**13** Jesús pijajivi dovathi peyajavajinavanapaevi vecuacapitsappona. Piavitanevi ata mataexabapona aceiteranéta. Bajarapacuenia Jesús pijajivi jamatejemayaexanapona piavitanevi.

*Pacuenia bajayata Juanpijinë jivibautisabinëmi beyaxuabatsiyabara pelivaisi*

*(Mt 14.1-12; Lc 9.7-9)*

**14** Herodes, Galileanacua pevetsinë. Nexata Herodes jumetane itsamonaenavëxaniabiaya pejumaitsijava Jesús yabara: “Juanpijinë raeta jivibautisabinëmi icatsia asaë petëpaecujinae. Bajaraxuata caëjépatsi Dioso pesaëta pinijicuene pexanaenexa,” pejaijaya itsamonaenavëxaniabiaya Jesús yabara, Herodes jumetane.

**15** Itsamonaenavëxaniabiaya Jesús yabara:

—Bajayata raeta ponëmi ponapona, profeta Elíaspijinëmi, baja raeta ponë, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinë profeta raja. Tsipaji rabaja pacuenia bajayata profetavi jinavanapa, bajara icatsia maponë itsije, jai tsaponae itsamonae.

<sup>16</sup> Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes itsa jumetane, Herodes ata jamatabëcuenenavëxaniabiaya jumaitsi Jesús yabara:

—Maraeta Juanpijinëmije, ponëmi bajayata xanë tajajivi vësiucutaxuabiaexanajë. Icatsia raeta asaë petëpaecujinae, jai Herodes jamatabëcuenenavëxaniabiaya Jesús yabara.

<sup>17</sup> Bajarapacuenia Herodes jumaitsi tsipaji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexata vajabitsaëvi Juanpijinë cobecëtsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajérëta. <sup>18</sup> Nexata Herodes pejuyapijinë pijava peyacajérëtsixae, Juanpijinë abaxë itsa apo vaetabitsi, muxujoba Herodes. Juanpijinë jumaitsi Herodesjavabelia:

—Acuenebi raja nejuyapijinë pijava nepitsijava," jai Juanpijinë Herodesjavabelia.

<sup>19</sup> Nexata bajarapacuenia Juanpijinë pejumaitsixae, itoyatsi Herodíasva. Nexata

abaxë Juanpijinë itsa ponapona penaneconitsivi pejebabiabibota, bajarapova picani Juanpijinë jamatabëbeyaxuabiaexanatsi. Itsiata apo caëjëpaetsi.

<sup>20</sup> Tsipaji Herodes yapëtane Juanpijinë bitso pejamatabëxanepanaenëcuene. Nexata Herodes yaiyatane Juanpijinë. Bajaraxuata Herodes apo tocopatsi pijava pejamatabëcueneta pebeyaxuabinexatsi Juanpijinë. Juanpijinë itsa cuaicuajai tsabiabi Herodesjavabelia, nexata picani Herodes jamatabëbëjai tsabiabi pijaneconi yabara. Itsiata Herodes xaniavaetsia namuxunaevetabiaba.

<sup>21</sup> Nexata pamatacabí Herodes najamatabënapita penaexanaematacabí, najamatabëxaina pexaniafiesta pexanaenexa. Bajarapafiestajava Herodes junata pijaboyaberena jivi ayaubitsaëtoxaneto penabaninexa. Junata Herodes pijajivi, pamonae toevetatsi pijairanë. Junata vajabitsaëvi pevetsivinua. Junata petuxanevinua, Galilea nacuata pejinavanapaevi. Nexata bajarapafiestajavata Herodíasva toyapëxanepanatsi Juanpijinë pebeyaxuabiaexanaenexatsi.

<sup>22</sup> Herodíasva toyapëxanepanatsi tsipaji pexënatoyo joneya Herodes pejunatsivi pebarënanecaejavalia pijacujirucuenia caevayo peyavajibinexa. Nexata Herodes pejunatsivi bitso barëitajitsipa pejonëyo peyavajibijava. Nexata Herodes najumecapanepaeya pexaniajaijumeta jumaitsi pejonëyojavabelia:

—Nevajëre xua jitsipame. Carajutsianatsi raja.

<sup>23</sup> Pacuenejava nevajëtsianame, carajutsianatsi. Itsa nevajëtsianame taneevetsiaexanaenacua ata, tuatuajëjava carajutsianatsi, jai Herodes najume-

capanepaeya pejionëyojavabelia.

<sup>24</sup> Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodíasva pexënatojovabelia jumaitsi:

—Juan jivibautisabinë pematabocoto vajëre, jai.

<sup>25</sup> Nexata bepijia bajarapovayo jopajoneya Herodes peecaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

<sup>26</sup> Nexata Herodes pinijicuenia bejamatabëjiobi tsanajetsireca. Herodes nexata acuenebi:

“Jume,” pejaijava. Tsipaji baja Herodes najumecapanepaeya jumaitsi pejionëyojavabelia pexaniajajumeta daxita pejunatsivi pitabarata.

<sup>27</sup> Nexata Herodes bepijia itoroba vajabitsaënë petocarenanexatsi Juan pematabocoto.

<sup>28</sup> Vajabitsaënë nexata pona penaneconitsivi pejebabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

<sup>29</sup> Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

*Pacuenia Jesú斯 pexaejava rajuta cinco mil  
ponëbejeyabara pelivaisi  
(Mt 14.13-21; Lc 9.10-17; Jn 6.1-14)*

<sup>30</sup> Jesú斯 pitorobivi, apóstolevi, naviabanaje-tarubena Jesújavaberena. Nexata bajarapamonae Jesújavabelia navajunupaeba daxita pacuenе exanavanapa, pacuenia ata jivi livaisi tsipaebavanapa. <sup>31</sup> Nexata Jesú斯 jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesú斯.

Bajarapacuenia Jesú斯 jumaitsi pijajivijavabelia tsipaji jivibitsaëtoxanetonë topatabiabatsi. Itsamonaе naviabaponabiaba. Itsamonaе juya patabiaba. Nexata Jesú斯 pijajivi pebarënabaninexa, apo cuenecaëjëpabiabitsi. <sup>32</sup> Nexata Jesú斯 épabajivi jerata yajavapona itsabelia jivi ajibi. <sup>33</sup> Itsiata jivi ayaubitsaëtoxaneto pëtanetsi Jesú斯 peponaejava. Nexata itsabelia Jesú斯 pona, matatsënëa pënacujinaerubenatsi daxita tomaranëpjjivi. Caranata Jesú斯 pevajënaeyabelia pata bajarapamonaе. <sup>34</sup> Itsa baja Jesúsbana nonobajunaya jeravecua, Jesú斯 tane jivibitsaëtoxaneto. Nexata Jesúς bajarapamonaе itaxutobejiobiati. Nexata Jesú斯 bajarapamonaе sivajamatabëjumaitsi mapacueniae:

—Pacuenia baitsi ovejabitsaëtoxaneto itsa toajibitsi pevetsinëtsi, bajara itsi mapamonaеje, sivajamatabëjai Jesú斯.

Nexata Jesú斯 ayaicuenia livaisi tsipaeba bajarapamonaejavabelia. <sup>35</sup> Itsa baja bitso caniviyotsia,

Jesús pijajivi cujibarenatsi. Jumaitsitsi:

—Canivyo rabaja bitso. Majota ajibi pexaejava. Tsipaji itsajivi ata pijabo apo xainae.  
**36** Itorobare baja jivi peponaenexa imoxoyo penaetomaranëjavabelia pecомуacaenexa pexaejava, jaitsi Jesús pijajivi.

**37** Jesús nexata jumaitsi pijajivijavabelia:

—Paxamë parajure pexaejava, jai.

Nexata Jesús pijajivi jumaitsi:

—¿Paponaenajë tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

**38** Jesús icatsia jumaitsi pijajivijavabelia:

—¿Detsa papanbëbeje paxainame paxamë?  
 Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai Jesús pijajivi.

**39** Nexata Jesús itoroba daxitajivi penaenexa ponajavata. **40** Nexata bajarapamonae pepobitsäetonë natsanaeya ena. Caebitsaëtota enapona cien pajivibeje. Itsabitsaëtota enapona cincuenta pajivibeje. Bajarapacuenia caebitsaëto canacujitsia enapona. **41** Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaecotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava.

Nexata juya Jesús pijajivi pan tsicobetsana jivijavabelia. Djuuaijavaxi ata tsicobetsana jivijavabelia. <sup>42</sup> Daxita xaniavaetsia nabane. <sup>43</sup> Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë. <sup>44</sup> Pamonae pexaejava xane, ayaibitsaëtoxaneto. Itsiata ëpebijivi namataëjëtatsi cinco mil ponëbeje.

*Pacuenia Jesús mene itaboxoya najetaruca  
yabara pelivaisi*

(Mt 14.22-27; Jn 6.16-21)

<sup>45</sup> Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxë caenë nacopatanuca bajarajota. <sup>46</sup> Itsa baja jivi napëvereta penaviabijava, Jesús junaya petsutojumabetsia pevajëtsinexa Diosojavabelia. <sup>47</sup> Itsa baja bitso meravi, Jesús pijajivi pucaxaneto itapavecua tajë baja yanajetarubenalia. Jesús abaxë bajarapaepatota caenë nacopatanucarena pucaxanetoitapatarena. <sup>48</sup> Nexata Jesús tane pijajivi petoayapëbejejavatsi pevaetsijava. Tcipaji bitso joviboxaneto ayai pevajënaeverena. Bajaraxuacujinae bajayacunua, ajena matacabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. Rovia picani xenetsijitsia.

**49** Jesús pijajivi itsa tanetsi mene itaboxoya penajetarucaejava, Jesús pijajivi jamatabëjumaitsi:  
—¡Petëpaenëmi raeta pejumape najetaruca! ja-matabëjai.

Nexata Jesús pijajivi vavajai tsaxuabi ayajumeta. **50** Tsipaji daxita Jesús pijajivi tane bajaran-pacuenia penajetarucaejava. Nexata Jesús pijajivi jamatabëcuenenajunaviaca. Nexata Jesús bepijiayo jumaitsi pijajivijavabelia:

—Xanë raja. Pëtsa panecujunavame. Pajamate-jemamëre saya, jai Jesús pijajivijavabelia.

**51** Nexata baja Jesús nonolia bajarapajera ënëabelia. Ajibi baja tsaxuabi jovibo. Nexata Jesús pijajivi pinijicuenia jamatabëcuenenajunaviaca. Tsipaji tane jovibo, malataca yajava, Jesús piajibiaexanaejava. **52** Jesús baja picani pijajivi copiaya tane, pan tsiquirijavayomi ata, jivibitsätoxanetojavabelia Jesús perajutsijava. Itsiata Jesús pijajivi apo jamatabëcueneyapëtae Jesús pecaëjëpaenëcuenetsi pinijicuene pexanaenexa. Abaxë bajarapamonae ajamatabëcuenetaja.

*Pacuenia Jesús jamatejemayaexana piavitanevi  
Genesaret nacuata yabara pelivaisi  
(Mt 14.34-36)*

**53** Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. **54** Nexata Jesús, pijajivi yajava, nonotajunaya jeravecua. Bajarajota bepijia jivi yapëtanetsi Jesúscuene. **55** Nexata Jesús pepatsijava penatsipaebinexa, navajunucacujinaejinaruta daxita bonëjava. Nexata piavitanevi pijacamaxita

yavëtacarapatatsi itsajota jivi jumetane Jesús pepatsijava. <sup>56</sup> Jesús pata tsiquiritomaraxijava, pinijitomaranëjava ata, tomarapënëya penaebonëjava ata. Daxitajava, itsa patomarata Jesús patabiaba, bajarapatomaranëjava callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamonae Jesús penaxatatsijavacopia tojayataponatsi, jamatejema baja tsponae piavitanejavamivecua.

## 7

*Pacuenia Jesús tsipaeba xua jivi jamatabëcuenebijianatsi yabara pelivaisi*

*(Mt 15.1-20)*

<sup>1-4</sup> Daxita judíovi catsiteca pijasalinaivimi pijacuene. Judíoviyajuvënëvi, pamonae fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabëcuenenavëxaniabiaya jamatabëjumai tsabiabi:

—Itsa catsitecajë tajasalinaivimi pijacuene, nexata Dioso aneconijibia netaena, jamatabëjai tsabiabi.

Nexata bajarapamonae pijasalinaicuenia anijatonë xaniavaetsia itsa apo napënancobequiatsi, pexaejava apo xaeysiabi. Itsajota pexaejavacuene canajetabiaba, bajaraverena itsa naviaba pecomuacaecujinae,

bajarapamona epijasalinaicuenia xaniavaetsia itsa apo napënanacobequiatsi, pexaejava apo xaeyabiabi. Bajarapamona epijamatatsënëa navitsia itsacujiruxi ata, epijasalinaivimi pijacujiru, catsiteca. Bajarapamona etazaxi, mera peyajebinëanë ata, pecasetsinëanë ata, camanë ata, epijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamona e tane Jesús pijajivi judíovi epijasalinaicuenia anijatonë napënanacobequiatsinejeva penabanijava. Bajaraxuata bajarapamona e jumaitsi Jesúsjavabelia:

—Jesús, nijajivi naneconita Diosojavabelia.  
<sup>5</sup> Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, anijatonë napëna apo nacobequiatabiabi, jai bajarapamona e Jesúsjavabelia.

<sup>6</sup> Jesús nexata jumaitsi bajarapamona e javabelia:

—¡Paxamë saya jivi paneyamaxëitojorobivi! Diosojumelivaisipaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsijava paxamë yabara profeta Isaíaspijinë peyaquinalivaisita jumaitsi mapacueniae:

Bajarapamona e nejitsipaena saya pijumeta. Itsiata pepo tanejitsipaejamatabëcuene nevecuatajë tsane. <sup>7</sup> Saya baitsi bajarapamona e pijajumaitsita tsane: “Pacajitsipatsi,” nejai itajara tsane. Itsiata apo xaniajai tsane.

Bajarapamonae saya jivi tsipaebaponaena pejamatabëcuenebijilivaisi. Pepo taitorobili- vaisi apo tsipaebi tsane, jai tajëvelia Dioso pejumaitsjava paxamë yabara Isaíaspijinë peyaquinaelivaisita, jai Jesús bajarapamonaejavabelia.

**8** Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacuene pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. **9** Apo pajumecovënëtsimë Dioso pitorobilivaisi vajasalinaivi pijacuene panecatsitecaenexa. Apo pajumecovënëtsi atamë Dioso pitorobilivaisi, jamatabëcuenenavëxaniabiaya pajamatabëjumaitsimë tsabiabi: “Pexaniacuene raja exanajë,” pajamatabëjamë tsabiabi. **10** Bajayata Dioso najumecopata Moiséspijinëta. Bajarapalivaisi jumaitsi: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsili- vaisi. **11-12** Itsiata baitsi jane paxamë jivi pamuxubijiapenetabiabame peyaiyataeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita

bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenon-aeyaniva,” pajamë tsabiabi jivijavabelia.

**13** Nexata caranata Dioso pejumaitsijume: “Axa yaiyataema. Ena ata yaiyataema,” pejaijume, paxamë jivi pacopabiaexanaponame. Tsipaji paxamë patsipaebaponame saicaya vajasalinaivimi pijalivaisi. Itsalivaisianë ata pematsatsënëa saicayacuenia patsipaebaponame Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

**14** Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtanexamë.

**15** Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijanaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuajai, bajara baitsi jane xua jivi bajamatabëcuenebijanatsi.

**16** Pajivi jamatabënejumeyapëtane patacatsipaebilivaisi, nemamuxunaevetsi xaniavaetsia, jai Jesús.

**17** Itsa baja Jesús jivivecua natixita, boyá joneya. Nexata boyalia pijajivi yanijobatsi bajarapalivaisi.

**18** Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijanaetsi. Diosojavabelia apo vënananeconitsi.

**19** Tsipaji raja jivi pexaejava apo tsijamatabëëthëjonetsi.

Saya pënëareca joneca. Bajaraxuacujinae icatsia vecuapitsaptsi, jai Jesús.

Bajarapacuenia Jesús jumaitsi Jesús pijajivi peyapétaeyaexanaenexa pacuenia daxitacuene jivi pexaejava xae ata, apo pibisiacuene.

**20** Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijanatsi.

**21** Tsipaji rabaja jivi pejamatabëëthëtojavavetsina pitsapa pibisiacuene penajamatabëxainaenexa.

Pitsapa pebi pijava pevecuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatae jamatabëcuenenexa.

Pitsapa jivitonë pebeyaxuabijamatabëcuenenexa.

**22** Pitsapa penacobetoxotsijamatabëcuenenexa. Pitsapa itsamonaecuene pecobecovë penaxainaeyabijamatabëcuenenexa. Pitsapa piacujirubejedamatabëcuenenexa. Pitsapa itsamonaejavabelia peyamaxëitojorobijamatabëcuenenexa.

Pitsapa itsamonaecuene pecobecaëbijamatabëcuenenexa. Pitsapa itsajivi pibisiacuenia pebaracuaicuajai jamatabëcuenenexa. Pitsapa ayajamatabëcuenejivi penataejamatabëcuenenexa. Pitsapa saya

jema peponaponaejamatabëcuenenexa.

**23** Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuenia jivi jamatabëcuenebijanatsi, jai Jesús pijajivijavabelia.

*Pacuenia Jesús itsanacuapijiva pexënatoyo tojamatejemayaexana yabara pelivaisi  
(Mt 15.21-28)*

<sup>24</sup> Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsita acuenebi muetsia pepatsijava.

<sup>25</sup> Nexata bepijia petiriva vënëlivaisitaetabatsi Jesús pepatsijava. Nexata petiriva pata Jesúsvaberena. Nexata bajarapova yaiyataeya Jesús pitabarata pematabacobëta nucajunua. Bajarapova pexënatoyo dovathi yajavaponapona.

<sup>26</sup> Bajarapova sirofeniciaviriava, apo judíova. Nexata Jesúsvabelia jumaitsi:

—Pexaniacuene bitso netoexanare. Taxënatovayo netovecuacapitsapare dovathi, jai bajarapova.

<sup>27</sup> Nexata Jesús jumaitsi bajarapovajavelia:

—Copiaya abaxë veyavenonajë tajanacuapijivi, judíovi. Tsipaji apo xanepanae xamë itsanacuapijivamë copiaya tacayavenonaenexa. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajérëtsipajë tarajutsinexa avirixijavelia, bajara itsinë tsipae, jai Jesús bajarapovajavelia.

<sup>28</sup> Itsita baitsi jane bajarapova ajumesaë tsaponae. Icatsia jumaitsi Jesúsvabelia:

—Xaniajamë rabaja picani. Itsita neyavenonare. Tsipaji avirixi ata mesa bëxëpanata itsa nubena, nexata pejevaxi pexaepanpërë itsa othopareca mesa bëxëpanareca,

banaxane avirixi ata. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>29</sup> Nexata icatsia Jesús jumaitsi bajarapovajavelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapisapatsi nexënatovalo, jai Jesús.

<sup>30</sup> Itsa baja bajarapova pijaboyabelia pata, pexënatovalo taeyabuata jamatejema baja pebocaejava camata. Nexata yapëtane pexënatovalo baja petovecuapisapaejavatsi dovathi.

*Pacuenia Jesús jamatejemayaexana bitso siyanë, apo pejumetaenë, piajumecécënë, yabara pelivaisi*

<sup>31</sup> Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia.

<sup>32</sup> Bajarajota jivi tocapatatsi siyanë, bitso apo pejumetaenë, piajumecécënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuai-jainexanua, jai bajarapamonae.

<sup>33</sup> Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvvojobëta. Bajaraxuacujinae nacobesioniata. Ebarëtojayata. <sup>34</sup> Nexata Jesús

athëbëa benaëcotsia. Jesùs athëbë venajumalixu-abica. Nexata Jesùs pijajumeta jumaitsi bajara-ponëjavabelia:

—¡Efata! jai.

“Efata,” pejajume Jesùs pijajumeta, mapajumetaje pejumaitsijume: “¡Muxuvorucaremelia!” pejajume.

<sup>35</sup> Bajarapacuenia Jesùs pejumaitsijavata, bajaraponë muxuvorucalia baja. Jumetane jane baja. Peebarëto ata jane baja xanepana. Natsipaeba baja xaniavaetsia. <sup>36</sup> Nexata Jesùs jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesùs asaëyata.

Itsiata bajarapamona jumeitavetsi atatsi, bitso tsipaebapona jivijavabelia. <sup>37</sup> Nexata pamona jumetane bajarapalivaisi, pinijicuenia jamatabëcuenenabenajaca. Bajarapamona jumaitsi:

—Bajaraponë, Jesùs, daxitacuenevitane pexainaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaejëpaevitsi ata pecuaicuajaijava, cuaicuajaiyaexanapona xaniavaetsia, jai bajarapamona Jesùs yabara.

## 8

*Pacuenia Jesùs rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)*

<sup>1</sup> Itsamatacabí Jesú斯 jivibitsaëtoxaneto muxunanacaetuatatsi. Nexata bajarapamonae penabannexa, bajarajota pexaejava apo xainae. Nexata Jesú斯 junata pijajivi. Jesú斯 jumaitsi pijajivijavelia mapacueniae:

<sup>2</sup> —Netsitabejiobi baja rovia mapamonaеje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. <sup>3</sup> Itsa meta itorobijitsipajë pijabonëjavabelia peponaenexa pexaejava xaenejava, apo asaë meta tsipae namutua peponaejava. Tsipaji raja itsamonaе pata tajëverena, jai Jesú斯 pijajivijavelia.

<sup>4</sup> Nexata Jesú斯 pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xainae, jai Jesú斯 pijajivi.

<sup>5</sup> Nexata Jesú斯 yanijoba pijajivijavelia.

—¿Detsa papanbëbeje paxainame? jai.

Nexata Jesú斯 pijajivi jumaitsi:

—Siete papanbëbeje paxainajë, jai.

<sup>6</sup> Nexata Jesú斯 itoroba daxitajivi penaenexa irata. Nexata Jesú斯 pita siete papanbëbeje. Nexata Diosojavabelia Jesú斯 jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesú斯 epatsicacapona pan. Nexata Jesú斯 pepatsicacaepan rajutapona pijajivijavelia. Nexata juya Jesú斯 pijajivi bajarapapan tsicobetsana daxitajivi pexaenexa.

<sup>7</sup> Dujuainëxinua xaina. Icatsia Jesú斯 jumaitsi Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi.  
<sup>8</sup> Daxitajivibitsaëtoxaneto nabane xaniavaetsia. Nexata peyajuvënëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. <sup>9</sup> Pexaejava nabane bejamatabëcuene cuatro mil pajivibeje. Nexata jane baja pexaejava pexaecujinae, Jesús jivi naviabiaexana pijabonëjavabelia.  
<sup>10</sup> Bajaraxuacujinae Jesús, pijajivi yajava, runareca jera ènëabereca. Jesús pijajivi barëpona Dalmanuta nacuayabelia.

*Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi*

*(Mt 16.1-4; Lc 12.54-56)*

11 Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaitsi Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuene athëbëvetsica pecaitorobinëcuenetsica, jai.

12 Nexata bajarapamonae yabara Jesús bitso jamatabëcuenebjai. Nexata Jesús athëbë venajumalixuabica. Jumaitsi:

—¿Detsa xuajitsia panevajëcame  
 pinijicuene patacatsitaexanaenexa  
 pataneyapëtaenexamë pepacuene Dioso  
 athëbëvetsica taneitorobinëcuenetsica. Xaniajanë  
 pacuenia pacatsipaebijitsiatsi. Itsiata

apo pacatsitaexanaetsi tsane pinijicuene taexanaejava, jai Jesús.

**13** Nexata baja Jesús bajarapamona vecuapona. Icatsia runareca jera énëabereca. Pucaxaneto itsapanabelia baja Jesús pona.

*Pacuenia Jesús pijajivi muxujioba fariseovi petsipaebilivaisi pejumecovénëtsianiva yabara pelivaisi*

*(Mt 16.5-12)*

**14** Jesús pijajivi nacofënëta pumarue. Nexata saya caepanbëyo capona jerata. **15** Nexata Jesús pijajivi muxujioba pejumecovénëtsianiva fariseovi itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovénëtsianiva.

**16** Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuajai bajarapacuenia Jesús pejumaitsijume yabara. Jesús pijajivi najumaitsi:

—Jesús nacajumaitsi: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi.

**17** Jesús pijajivi jamatabëcueneyapëtane bajarapacuenia jamatabëcuenenavëxaniabiaya penajumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacapon-aexae,” panajamë? Paxamë abaxë apo pane-jumeyapëtaemë xua yabara pacajumaitsitsi. Pa-jamatabëcuenetajamë bitso. <sup>18</sup> Pan yabara raja apo pacajumaitsitsi. Pan itsa namatavenonae-jitsipatsi, necaëjëpa taexanaenexa. ¿Apo panaja-matabënapitsimë tsipaji pacuenia exanajë pamata-cabi pan namatavenonatsi? <sup>19</sup> Pacujinae epatsica-cajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús pijajivi-javabelia.

Nexata Jesús pijajivi jumaitsi:

—Doce xuabeje pavënëtajë, jai.

<sup>20</sup> Jesús icatsia jumaitsi:

—Pacujinae epatsicacajë siete papanbëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtame bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

<sup>21</sup> Nexata Jesús jumaitsi pijajivijavabelia:

—¿Panejumeyapëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi pane-jumecovënëtsianiva fariseovi petsipaebilivaisi, panejumecovënëtsianiva nacuaevertsinë ata Herodes. Tsipaji bajarapamonae pacatsipaebiana

saicayacuenia Dioso pejumelivaisivecua, jai Jesús pijajivijavabelia.

*Pacuenia Jesús itaxutoxaniavaeta bitso pitaxutotsécënaenë, apo petaenë tsiquirijavayo ata, yabara pelivaisi*

<sup>22</sup> Jesús, pijajivi yajava, patajopa Betsaida tomarata. Nexata Jesús tocanajetarubenatsi bitso pitaxutotsécënaenë, apo petaenë. Pinijicuenia vajécatsi Jesús pitaxutojayatsinexa bajaraponë pitaxutoxanepanaenexa. <sup>23</sup> Nexata Jesús cobepita. Barëpona pesaicaeyojavabelia, tomrapenëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

<sup>24</sup> Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavänë, jai bajaraponë.

<sup>25</sup> Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane.

<sup>26</sup> Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa paebame itsajivijavabelia ata pacuene caexanatsi, jai Jesús.

*Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi*

*(Mt 16.13-20; Lc 9.18-21)*

<sup>27</sup> Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë

penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

**28** Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Eliaspijkenë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvënëne icatsia asaë,” jai tsabiabi xamë yabara, jai Jesús pijajivi.

**29** Nexata icatsia Jesús jumaitsi pijajivijavabelia.

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

Nexata Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi necapanepaenexa, jai Pedro Jesúsjavabelia.

**30** Nexata Jesús pijajivijavabelia jumaitsi:

—Pëtsa bajarapacuenia itsajivijavabelia papae-bame. “Cristo raja,” pajamë pëtsa xanë yabara, jai Jesús.

*Pacuenia Jesús tajëvelia navajunupaeba  
pebeyaxuabijavanexatsiyabara pelivaishi  
(Mt 16.21-28; Lc 9.22-27)*

**31** Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueniaje:

—Xanë, Daxitajivi Pematapijinënë, pinijicuenia bejiobinë tsane. Judíovi pijaancianovi, sacerdotevi penamatacitorobivinua, judíovi pecujarubivinua, apo nejumecovënëtsi tsane Cristonëcuñenë. Nexata bitso nebejiobiaexanaena. Bajaraxuacujinae nebeyaxuabiana. Itsita baitsi jane tatëpaecujinae, acueyabi matacabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

<sup>32</sup> Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—Pëtsa bajarapacuenia cuaicuajamë netëpaejavanexa yabara, jai Pedro Jesúsjavabelia.

<sup>33</sup> Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucae Pedrojavabelia:

—Dovathi, nevecuanatixire! Tsipaji xamë apo jitsipaemë pacuenia Dioso jitsipa taexanaenexa. Saya ejivi pacuenia jitsipa taexanaenexa, jitsipame, jai Jesús.

<sup>34</sup> Nexata Jesús junata pijajivi, daxita jivibitsaëto yajava. Jumaitsi bajarapamonaejavabelia:

—Pajivi jitsipa tanepënaponaejava, bajarapajivi copatsi pejitsipaecuenia pexanaenexa penajamatatabëxainabiabijavami. Exanaponapona taitorobicuenia. Najamatatabëcuñeveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piajamatabëcuenesaë tsaponaponaenexa. Nexata jane baja xuacujinae nepënaponaena. <sup>35</sup> Pajivi

exanaponapona penatojitsipaecuenia, apo xainae tsane matacabi apo pevereverecaejava. Pajivi xanë tajamatabécueneta copata penatojitsipaecuenia pexanabiabijavami, jivi tacapanepaelivaisitanexa pejamatabécuenetanua, bajarapajivi xainaena matacabi apo pevereverecaejava. <sup>36</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecuene apo capanepae tsanetsi Diosojavabelia. <sup>37</sup> Tsipaji acuenebi tsane itsajivi ata pemamatotsinexa penaxuabiyaniwa Diosovecua. <sup>38</sup> Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlivaisicaura tsane xanë tajajivitonëcuene, tanejume-covënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatacabì icatsia patsianicajë. Baitsi pamatacabì xanë, Daxitajivi Pematapijinënë, ángelevi yajava, patsianicajë, pamatacabì yajavapatsianicajënuá taxa Dioso pijapenivenivenaecotia, jai Jesús pijajivijavabelia.

## 9

<sup>1</sup> Icatsia Jesús jumaitsi jivijavabelia:  
 —Xaniajanë pacuenia pacatsipaebijitsiatsi.  
 Daxita paxamë patëpaenejevamë, Dioso taxuxu-abiana pijajivi pevetsijava mapanacuataje.  
 Nexata paxamëyajuvënëvi pepuatae tsane

Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

*Pacuenia Jesús caeepatoyo perabënivenivenataba  
yabara pelivaisi*  
(Mt 17.1-13; Lc 9.28-36)

<sup>2</sup> Jesú斯 petépaejavanexa tajëvelia penava-junupaebicujinae, seis pamatacabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatatabëxëyo: Pedro, Santiago, Juan. Bajarapamatatabëxëyo Jesús barëjunaya pinijit-sutoxanetojumabetsia. Nexata petsutojumatatsia Jesús perabëniveniva bajarapamonae pitabarata. <sup>3</sup> Jesú斯 penaxatatsijava bitso nivenivena. Bitso niojai. Mapanacuataje pexaniaquiatsiva ata apo caëjëpaetsi bajarapacuenia peniojaiyaexanaenexa. <sup>4</sup> Jesú斯 pijajivi bajarajota tane jemata penaitajëtsijava bajayata petépaenëmibeje, Ellaspíjinëbeje Moiséspíjinëbeje. Jesús barëcuaicuajaitsi bajaraponëbeje. <sup>5</sup> Nexata Pedro jumaitsi Jesúsjavabelia mapacueniaje:

—¡Patatuxanenë, pijacuaxae panebarëponame! Pacatoexanaenatsi acueyabi pabobërëtobeje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

<sup>6</sup> Bajarapacuenia Pedro jumaitsi Jesúsjavabelia canaëjëtsinejeva. Tsipaji bitso bajarapamonae najunaviaca. Nexata apo yapëtae pacuenia jumaitsijitsia. <sup>7</sup> Nexata daxita bajarapamonae

pematatsënëvetsica itarërëbo mataacataxuabatsi. Nexata bajarapamonaе jumetane bajara-paitarërëbojavavetsica Dioso pejumaitsijava.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivi-javabelia.

<sup>8</sup> Bajarajota bajarapamonaе itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

<sup>9</sup> Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Bajarapamonaе, acueyabi ponëbeje, jume-covënëta pejumaitsicueniatsi. Itsiata épamonaе nayanijobabiaba.

—Jesús jumai tsabiabi: “Tatëpaecujinae icatsia asaënë tsane,” jai tsabiabi. ¿De tsamëra pajamatabëcuene xaina bajarapalivaisi? najai tsabiabi bajarapamonaе.

<sup>11</sup> Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspjinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, ponë Dioso athëbëvetsica itorobijitsiatsica pepo vajanacacapanepaenënexa jane baja,” jai tsabiabi? jai Jesús pijajivi Jesúsjavabelia.

**12** Nexata Jesús jumaitsi pijajivijavabelia:

—“Copiata Elíaspjinë patsiana.      Nexata bajaraponë jamatabëcuñexanetsiana daxitajivi,” itsa jai, Juanpijinëmi jivibautisabinëmi yabara jumaitsi.   Nexata baja xaniajai pacuenia judíovi pecujarubivi jumaitsi.   Tsipaji baja Juanpijinë tavajënaeya jivi jamatabëcuñexanetanajetuca. Xanë, Daxitajivi Pematapijinënë, athëbëvetsica Dioso nitoroba jivi tacapanepañexa.   Nexata xanë yabara tajëvelia Dioso pejumelivaisibaxutota jumaitsi mapacueniaje: “Bejiobi tsane pinijicuenia.   Apo jitsipaetsi tsane. Naitaxutojematsianatsi,” jai xanë yabara tajëvelia Dioso pejumelivaisibaxutota, jai Jesús pijajivijavabelia.

**13** Jesús icatsia jumaitsi pijajivijavabelia Juanpijinëmi yabara:

—Xaniajanë pacuenia pacatsipaebijitsatsi. Elíaspjinë rabaja patajopa. Pepatsicujinae baja exanatsi daxita pacuenia jamatabëexanatsi.   Nexata exanatsi pacuenia baja cajena Dioso pejumelivaisibaxutota tajëvelia jumaitsi bajaraponëmi yabara, jai Jesús pijajivijavabelia Juanpijinëmi yabara.

*Pacuenia Jesús jamatejemayaexana pejevaxinë, dovathi peyajavaponaponaenë, yabara pelivaisi*

*(Mt 17.14-21; Lc 9.37-43)*

**14** Jesús pijajivi, acueyabi ponëbeje, petsutojumabetsia pebarëponaecujinae, icatsia barënaviatsica.   Itsamonae Jesús pijajivi pepuenetsivijavabetsica, barënaviatsica.   Nexata Jesús tane pijajivi jivibitsaëtoxaneto pevajënae

pemata toyorona ejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. <sup>15</sup> Nexata bajarapamona itsa taerécëpa Jesús, daxita jamatabëcuenebarëyaya cujinaeyeca Jesúsjavabelia pebajacobinexatsi Jesús. <sup>16</sup> Nexata Jesús jumaitsi bajarapamona ejavabelia:

—¿Detsa xua yabarä panajumeana enotame pini-jicuenia? jai Jesús.

<sup>17</sup> Caenë bajarapajivi bitsaëtoxanetoyajuvënënë jumaitsi Jesúsjavabelia:

—Jesús, mara picani taxënatonëyo, dovathi peyajavaponaponaenëyo, catocanajetarucatsije. Maponëyoje dovathi apo netonatsipaebiaex-anaetsi. <sup>18</sup> Itsa raja dovathi vaetababiabatsi, irata xuababiabatsi. Nexata bajarajota pecu bothamu tsabiabi. Vono quirajainua tsabiabi. Daxitanëyo aperabëbaba tsatababiabireca. Picani raja nijajivijavabelia jumaitsinë: “Panetovecuacapitsapare dovathi,” janë. Itsita bajarapamona apo caëjëpaetsi tanetovecuacapitsapaenexa, jai bajaraponë Jesúsjavabelia.

<sup>19</sup> Jesús nexata jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenona ejavanexa! Bajaraxuata apo pacajamatbabëcueneçaëjëpae pejevaxinë panevecuacapitsapaenexa dovathi. ¿Detsa paepatojebi abaxë paxamëjavata ponaponaenajë? ¿Detsa paepatojebi abaxë paxamëjavabelia ajamatbabëcuenesaënë tsaponapona ae tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

**20** Nexata tocarenatsi Jesús pejevaxinë. Dovathi itsa tanetsi Jesús, nexata icatsia bajarajota dovathi pejevaxinë tēpjonyeaexanatsi. Irata xuabatsi pejevaxinë. Nexata pejevaxinë natorenaba irata. Pethamu pitsapa pecuibuatsina. **21** Nexata Jesús yanijoba pejevaxinë paxajavabelia.

—¿Detsa pamatacabibeje xaina petaxuxuobicuji-naetsi mapacueneje? jai Jesús.

Nexata pejevaxinë paxa jumaitsi:

—Penacuetojavaveliacujinae cajena taxuxuabatsi. **22** Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamë itsa cacaëjëpa itsacuenia ata taneyavenonaenexamë, ¡nitaxutotsoniataema! ¡Neyavenonare! jai pejevaxinë paxa Jesúsjavabelia.

**23** Nexata Jesús jumaitsi pejevaxinë paxajavabelia:

—Pajivi jumecovënëta Dioso peyavenonaejavexatsi, bajarapajivi Dioso yavenonatsi daxita xua namatavenona, jai Jesús.

**24** Nexata pejevaxinë paxa aëjai. Jumaitsi:

—¡Jumecovënëtajë baja cajena! ¡Neyavenonare bitso orijibia tajumecovënëtsinexal jai bajaraponë Jesúsjavabelia.

**25** Nexata Jesús itsa tane jivibitsaëtoxaneto penacaetuaponaejava Jesúsjavaberena, nexata Jesús itaveta dovathi. Jumaitsi:

—Dovathi, xamë pejevaxinë apo nenatsipaebi-aexanaenë. Apo nejumetaeyaexanaenënu. Xanë caitavetatsi. Pitsapare mapapejevaxinëvecuaje. Pëtsa baja icatsia junuame matavëjëa maponëyojavaberena, jai Jesús dovathijavabelia.

**26** Nexata dovathi pejevaxinë icatsia aëjaiyaexanatsi. Tëpajoneyaexanatsi. Vecuapitsapsatsi jane baja. Puenetabuatatsi bepetëpaenëyo. Nexata itsamonaе bajarajota jumaitsi:

—Pejevaxinë rabaja tēpa, jai bajarapamonae.

**27** Nexata Jesús cobepita pejevaxinë. Cobevaetabiaya yotsina. Nexata pejevaxinë nonotabapuna.

**28** Nexata xuacujinae Jesús boyta itsa joneya, Jesús pijajivi jumaitsi:

—¿Detsa xuajitsia meta paxanë apo panecaëjëpae patavcuacapitsapaenexa dovathi? jai Jesús pijajivi.

**29** Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemë tsipae panevajëtsinexa asaëyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

*Pacuenia icatsia Jesús tajëvelia navajunupaeba pebeyaxuabijavanexatsiyabara pelivaisi*

(Mt 17.22-23; Lc 9.43-45)

**30** Jesús pejevaxinë dovathi pevecuacapitsapae-cujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacuajava. Jesús jitsipa pijajivi pebarënajetarucaenexa bajaraxuayo itsajivi ata yapëtaenejevatsi.

**31** Tsipaji Jesús pebeyaxuabijavanexatsi, tajëvelia navajunupaebapona pijajivijavabelia. Jumai tsaponae Jesús pijajivijavabelia mapacueniae:

—Xanë, Daxitajivi Pematapijinënë, necanajetsiana itsamonaе pecobeyabelia. Bajarapamonae

nebeyaxuabiana. Itsiata baitsi jane tanebeyaxuabicusinae, acueyabi matacabita, icatsia asaënë tsane, jai tsaponae Jesús pijajivijavabelia.

<sup>32</sup> Itsiata pijajivi apo jumeyapëtaetsi. Bajaramponae ajumeura Jesúsjavabelia peyanijobinexa bajarapalivaisi yabara.

*Pacuenia Jesús pijajivi: “¿Detsa ponë vaxaitisiyajuvënënë nacavecuaayajamatabëcuenenë bitso?” najai tsanajetarubenaе yabara pelvaisi (Mt 18.1-5; Lc 9.46-48)*

<sup>33</sup> Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

<sup>34</sup> Nexata Jesús pijajivi moya. Tsipaji Jesús pijajivi namutua najumaitsi tsanajetarubenaе:

—¿Detsa ponë vaxaitisiyajuvënënë nacavecuaayajamatabëcuenenë bitso? najai tsanajetarubenaе Jesús pijajivi.

<sup>35</sup> Nexata Jesús eca. Junata pijajivi, doce ponëbeje. Jumaitsi pijajivijavabelia:

—Pajivi jitsipa ayajamatabëcuenejivi penaexanaenexa daxitajivi matatoxenetsia, bajarajivi beveliamatabëcuenejivi natae peyavenonaenexa daxitajivi, jai Jesús pijajivijavabelia.

<sup>36</sup> Bajaramponae Jesús cobepita pejevaxinëyo. Pijajivi pitabarata nuteta. Bajaramponae Jesús isapita. Jumaitsi pijajivijavabelia:

<sup>37</sup> —Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo

necopiaapitsi. Ponë nitoroba, neyajavacopiaapita, jai Jesús pijajivijavabelia.

*Pacuenia Jesús jumaitsi pijajivijavabelia itsa vënélivaisitane itsanë dovathi jivivecua pecapitsapaejava Jesús pevénëta yabara pelivaisi  
(Mt 10.42; Lc 9.49-50)*

<sup>38</sup> Jesús pijajivitonë, Juan, jumaitsi Jesúsjavabelia:  
—Tajatuxanenë, pataniji itsanë nevénëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

<sup>39</sup> Nexata Jesús jumaitsi Juanjavabelia:  
—Pëtsa paitavetame bajaraponë. Tsipaji raja pajivi pinijicuene pexanaejava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia.  
<sup>40</sup> Tsipaji raja pajivi pibisiacuene apo najamatabëxainae vaxaitsijavaberena, bajarapajivi nacajamatabëcuenyavenona. Bajarapajivi bevaxaitsijamatabëcuenejivi.  
<sup>41</sup> Xaniajanë pacuenia pacatsipaebijitsatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

*Pacuenia Jesús pijajivi muxuioba itsajivi ata pibisiacuene pexanaeyaexanaeyaniva yabara pelivaisi*

*(Mt 18.6-9; Lc 17.1-2)*

<sup>42</sup> Icatsia Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

<sup>43</sup> Bajaraxuata panecobeta pibisiacuene itsa paexaname, panacobecaucure. Itsiata xanepana panejonenexa cobemataxucaeya apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. <sup>44</sup> Bajarajota apo tëpae oro, jivivixaevi. Isotocotia ata apo itaxupae caeto ata. <sup>45</sup> Itsa panetaxuta ata pibisiacuene paexaname, panataxucaucure. Itsiata xanepana panejonenexa taxumataxucaeya apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. <sup>46</sup> Bajarajota apo tëpae oro, jivivixaevi. Isotocotia ata apo itaxupae caeto ata. <sup>47</sup> Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë

apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. <sup>48</sup> Bajarajota apo tēpae oro, jivivixaevi. Isotocotia ata apo itaxupae caeto ata.

<sup>49</sup> Dajubinë jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabëcuenexanepanaenexa, daxita Dioso pijajivi ata jamatabëcueneëjëbianatsi mapanacuataje. <sup>50</sup> Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamë ata pajamatabëcueneitsimë tsipae Diosojavabelia, itsa apo pavecuapanepaemë tsipae papecajamatabëcuene ejëtaponaejava. Nexata pajamatabëcuenesaëmëre panejamatabëcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniva.

## 10

*Pacuenia Jesús jivi livaisi tsipaeba penacojiobinë pijava pexuabiyaniya yabara pelivaisi*

*(Mt 19.1-12; Lc 16.18)*

<sup>1</sup> Jesús baja pona Capernaum tomaravecua. Pona Judea nacuayabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaëtoxaneto pata Jesúsjavaberena. Nexata icatsia Jesús livaisi

tsipaeba bajarapamona. Tsipaji baja cajena Jesús livaisi petsipaebanajetarucaenë. <sup>2</sup> Nexata fariseovi Jesús cujibarenatsi petsipaebilivaisi yabara jamatabëcueneëjëbiaya peyanijobinexatsi. Nexata Jesús bijiaya itsa jumecanaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinë pijava pexuabinexa? jai.

<sup>3</sup> Jesús nexata jumaitsi fariseovijavabelia:

—¿Detsa pacuenia bajayata Moiséspijinë pacaitoroba panijavajivi panexuabiyanova? jai Jesús.

<sup>4</sup> Nexata fariseovi jumaitsi Jesúsjavabelia:

—Moiséspijinë tocopata, ponë pijava jamatabëxuaba, pexuabinexa. Itsiata baitsi jane Moiséspijinë tocopata, ponë pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponë pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponë pijava jamatabëxuaba, Moiséspijinë tocopata, jai fariseovi Jesúsjavabelia.

<sup>5</sup> Nexata Jesús jumaitsi fariseovijavabelia:

—Moiséspijinë raja bajarapacuenia pacatocopata paneajamatabëcuenalivaisitajaxae.

<sup>6</sup> Pamatacabí Dioso taxuxuaba nacua pexanaejava, bajarapamatocabita Dioso exana pebi, pijava yajava. <sup>7</sup> Bajaraxuata pebi itsa nacojioba pijavajavabelia, banatsata paxavecua, pena atavecua. <sup>8</sup> Nexata Dioso tane anijajivimibeje becaeji. Nexata Dioso apo tae beanijajivibeje. Becaejivi saya tane

Dioso. <sup>9</sup> Bajaraxuata itsanë ata apo bexuabi pijava. Tsipaji Dioso pejamatabëcuena napitsiaexanatsibeje, jai Jesús fariseovijavabelia.

<sup>10</sup> Bajaraxuacujinae Jesús pijajivi pijae pato itsa barënacopata bota, nexata Jesús pijajivi yanijobatsi bajarapacuene yabara. <sup>11</sup> Nexata Jesús jumaitsi pijajivijavabelia:

—Ponë pijava pexuabicujinae, itsava icatsia itsa pita, bajaraponë pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxë bajaraponë pexuabiva pepo pijavacuenia totanetsi. <sup>12</sup> Bajara pijinia itsi petiriva ata pamona pevecuaniatsicujinae, itsanë icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanë jaita pepo pamonavecua, ponë abaxë Dioso totanetsi pamonacuenia, jai Jesús pijajivijavabelia.

*Pacuenia Jesús jumaitsi pejevaxijivixijavabelia  
yabara pelivaisi*

*(Mt 19.13-15; Lc 18.15-17)*

<sup>13</sup> Jesúsjavaberena itsamonaes pejevaxijivixi tocapataponatsi Jesús pejayataponaenexa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús itsa tane bajarapacuenia pijajivi pejumaitisijava, Jesús jamatabëcueneanaepanaxuareca. Jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejевахијиви-  
ије jumeaebinejeva, xaniavaetsia bajumecovënëta  
palivaisi tsipaebatsi. Nexata pamonae jitsipa pe-  
jonejava Dioso pijanacuayabetsia, bajara pijinia  
pacuenia jumeaebinejeva xaniavaetsia bejume-  
covënëta Dioso pejumelivaisi. <sup>15</sup> Xaniajanë pacue-  
nia pacatsipaebijitsatsi. Mapitsipejевахијивијије  
itsa jumecovënëta palivaisi tsipaebatsi, bajume-  
covënëta xaniavaetsia jumeaebinejeva. Bajara pi-  
jinia pacuenia jumeaebinejeva, xaniavaetsia be-  
jumecovënëta Dioso pejumelivaisi pamonae jit-  
sipa pejonejava Dioso pijanacuayabetsia, jai Jesús  
pijajivijavabelia.

<sup>16</sup> Nexata Jesús isapitapona pejevaxijivixi, cae-  
jiviyo canacujitsia. Pecobeta jayatapona. Jesús  
pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

*Pacuenia pevëjäto, bitsо pexainaenë, cuaicuai-  
jai Jesúsjavabelia yabara pelivaisi  
(Mt 19.16-30; Lc 18.18-30)*

<sup>17</sup> Pabota Jesús pejevaxijivixi isapitapona, ba-  
jarapabovecua itsajavabelia baja icatsia Jesús  
ponaejitsia. Nexata baja Jesús itsa naropotsijitsia,  
pevëjäto cujinaerucarena Jesúsjavaberena. Jesús  
pitabarata pematabacabëta nucajunua. Jumaitsi  
pevëjäto Jesúsjavabelia:

—Petuxanenë, pexaniajamatabëcuenenëmë.  
¿Detsa pitsicuene bexanajë taxainaenexa  
matacabí apo pevereverecaejava? jai pevëjäto.

<sup>18</sup> Nexata Jesús jumaitsi pevëjätojavabelia:

—¿Detsa xuajitsia: “Pexaniajamatabécuenenëmë,” nejamë? Ajibi raja itsapebi ata pexaniajamatabécuenenë. Caenë rabaja Dioso pexaniajamatabécuenenë.

**19** Xamë baja yapëtaneme pacuenia Dioso pejumelivaisita itoroba jivi pejumecovénëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonaе pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexainaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjéatojavabelia.

**20** Nexata pevëjéato jumaitsi Jesúsjavabelia:

—Petuxanenë, daxita rabaja bajarapalivaisianë jumecovénëtajë pejevaxinëjavaveliacujinaenë, jai pevëjéato.

**21** Nexata Jesús asivaya tane pevëjéato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaecuene Dioso pijanacuatatsia. Nexata najamatabécue neverere, cabejiobiaexanae ata, cabeyaxuabijitsia atanua tajumelivaisi yabara, niajamatabécuenesaë tsaponaponaenexa. Nexata jane baja xuacujinae nepënponaename, jai Jesús pevëjéatojavabelia.

**22** Nexata pevëjéato itsa jumetane bajarapacuenia Jesús pejumaitsijava, najamatabécainaeya baja vecuapona Jesús. Tsipaji pevëjéato daxitacuene

bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevëjëato pecovëta Jesús pijajivi matayorotsia naëcota. Jumaitsi:

—jPamonae bitso daxitacuene pexainaevi, tsiyapëbejetsi penajamatabëcuene copatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

<sup>24</sup> Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamona bitso ëpexainaevajanexa najamatabëxaina, bajarapamona bitso tsiyapëbejetsi tsane pejonenexa taxa Dioso pijanacuayabetsia. <sup>25</sup> Pacuenia camello ayainëxae, acuenebi pejonejava palutaetoitaxutovojo tuala, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tspaji najamatabëxaina bitso ayaijava pexainaenexa, jai Jesús pijajivijavabelia.

<sup>26</sup> Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamona jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

<sup>27</sup> Nexata Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso

raja caëjëpatsi daxitacuene pexanaenexa, jai Jesús pijajivijavabelia.

**28** Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapénajinavanapatsi, jai Pedro.

**29** Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcuena, jivi tacapanepae-livaisitanexa pejamatabëcuenetanua, puena pija bomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianë ata, nexata bajarapajivi bitso ayaijava Dioso rajutsianatsi pepuenetsijavanëmi matatoxenetsia. **30** Caejavayomijamatabëcuene tsaponae, rajutsianatsi mapanacuataje cien xuabeje tsaponae pevajënaeyabelia. Bajarapajivi icatsia xainaena bonë, pematapijivi ata, pejuyapijivi ata, pena ata, pexi ata, pabianë ata. Itsiata bajarapajivi itoya tsanetsi mapanacuapijivije. Bejiobiaexanabiabianatsinua. Itsiata baitsi jane bexëajavabelia xainaena matacabi apo pevereverecaejava. **31** Pamonae aeconoxae mapamatacabitaje ayaijamatabëcuenevi tanetsi, bajarapamonae Dioso beveliajamatabëcuenevi exanaenatsi. Pamonae pijinia mapamatacabitaje beveliajamatabëcuenevi tanetsi, bajarapamonae Dioso ayaijamatabëcuenevi exanaenatsi, jai Jesús pijajivijavabelia.

*Pacuenia icatsia Jesús tajëvelia navajunupaeba  
pebeyaxuabijavanexatsiyabara pelivaisi  
(Mt 20.17-19; Lc 18.31-34)*

**32** Jesús, pijajivi yajava, najetaruca namutua. Pona Jerusalén tomarabelia. Jesús pijajivi, pepenaponaevitsi, jamatabécuenenabenajaca. Tsipaji Jesús apo junavi bajarabelia peponaejava, yapëtae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponëbeje, pesaicaeyojavabelia. Navajunupaeba tajévelia pacuenia exanaejitsiatsi Jerusalén tomarata.  
**33** Jumaitsi Jesús tajévelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, sacerdotevi penamatacaitorobivi, judíovi pecujarubivinua, pecobeyabelia necanajetsiana tanevaetabinexa. Nexata xanë neneconitsiana tanebeyaxuabinexa. Bajaraxuacujinae icatsia necanajetsiana itsanacuaverena pepatsivi pecobeyabelia.  
**34** Bajarapamona necanecaponaena. Nesuabiana. Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana jane baja. Itsiata baitsi jane tanebeyaxuabicujinae, acueyabi matacabita, icatsia asaënë tsane, jai tajévelia pijajivijavabelia Jesús penavajunupaebijavata pebeyaxuabijavanexatsi.

*Pacuenia Santiagobeje Juanbeje vajëtabeje  
 Jesúsjavabelia pexaniacuene petoexanaenexatsibeje  
 yabara pelivaisi  
 (Mt 20.20-28)*

**35** Zebedeo pexenatobeje, Santiagobeje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenë,  
pacavajétsijitsiatsibeje,  
pajitsipajébeje      patanetoexanaenexamëbeje,  
jaibeje Santiagobeje Juanbeje Jesúsjavabelia.

**36** Nexata Jesúsjumaitsi:

—¿Detsa pitsicuene pajitsipamebeje patacatoex-  
anaenexamëbeje? jai.

**37** Nexata Santiagobeje Juanbeje jumaitsi:

—Pamatacabi daxitacuene evetsianame, pane-  
tocopatsianamebeje patanaecaenexamëbeje nemux-  
uneneta vajanajuaevetsinexa. Itsanë naecaena  
necujuanenia. Itsanë naecaena netsavenonenia,  
jaibeje.

**38** Nexata Jesúsjumaitsi:

—Paxamëbeje apo payapétaemëbeje xua  
panevajétamebeje.      ¿Pacacaëjépabeje tsaja  
panenacaevetsinexabeje      papecabejiobiaex-  
anaenexamëbeje pacuenia xanë nacaevetsianajë  
tanebejiobiaexanaenexa?      ¿Pacacaëjépabeje  
tsaja panenacaevetsinexabeje papecabeyaxu-  
abinexabeje pacuenia xanë nacaevetsianajë  
tanebeyaxuabinexa?      jai Jesúspijajiv-  
tonëbejejavabelia.

**39** Nexata Santiagobeje Juanbeje jumaitsi:

—Jäjä, panecaëjépabeje cajena, jaibeje.

Nexata icatsia Jesúsjumaitsi Santiagobeje Juan-  
bejejavabelia:

—Paxamëbeje      pacabejiobiaexanaenabeje  
pacuenia xanë nebejiobiaexanaena. Pacabeyaxu-  
abianabejenua pacuenia xanë nebeyaxuabiana.

**40** Itsiata baitsi jane xua panevajétamebeje  
panenaecaenexamëbeje, itsanë tacujuanenia, itsanë  
tatsavenonenia, bajaraxua Dioso apo netocopatsi

patacatocatsinexabeje. Tsipaji raja taxa Dioso ēpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

**41** Diez ponëbeje, Jesús pijajivi, itsa vënëtane pepëya bajaraxua Santiagobeje Juanbeje Jesúsjavabelia pevajëcaejavabeje, nexata bajarapamonae jamatabëcuenebaraanaepana Santiagobeje Juanbejejavabelia. **42** Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevertsivi exana. Eveta caenacua canacujitsia. Nexata nacuaevertsivi pijajivicuenia eveta pamonae jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsi-nacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. **43** Pëtsa paxamë bajarapamonae cuenejëpaeya bajarapacuenia paexaname itsamonaejavabelia. Biji rajane ponë paxamëyajuvënëne jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. **44** Ponë paxamëyajuvënëne jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. **45** Tsipaji rabaja xanë ata, Daxitajivi Pematapijnë atanë, apo patajopaeñ jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaubitsaëtoxaneto

pibisiacuene pexanaeneconimi taneconimata-motsinexa, jai Jesúsjijavabelia.

*Pacuenia Jesúsjitaxutoxanepanaeyaexana Bartimeo, bitso pitaxutotsécënaenë, apo petaenë, yabara pelivaisi*

(Mt 20.29-34; Lc 18.35-43)

<sup>46</sup> Jesúsjijavabelia. Jesúsjicatsia, pijajivi yajava, itsamonaenua ayaubitsaëtoxaneto yajava, pitsapa Jericó tomara-avecua. Nexata Bartimeovënënë, Timeo pexënato, eca namuto muxuneneta. Bartimeo, bitso pitaxutotsécënaenë, apo petaenë. Jivijavabelia amoneya palata pevajëcabiabinë. <sup>47</sup> Nexata Bartimeo itsajumetane Nazaret tomarapijinë Jesúsimoxoyo penajetarucaejava, vavajai tsecae.

—¡Jesúsj, Davidpijinë pemomomë, nitaxutotsoniataema! jai tsecae Bartimeo.

<sup>48</sup> Nexata picani itsamonae jumeitavetatsi Bartimeo pemoyanexa. Itsiata bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae Jesúsjavabelia.

<sup>49</sup> Nexata Jesúsjuxunanucojopa. Jumaitsi jivijavabelia:

—Pajunaremena bajaraponë, jai.

Nexata bajarapamonae junarena Bartimeo. Pejunatsivirena jumaitsi Bartimeojavabelia:

—Najamatabësaëtaxuare. Nonotapunare. Jesúsraya cajunarena, jai bajarapamonae.

<sup>50</sup> Nexata Bartimeo penajumaxuabipana xuabapuna. Bepijia najetabarena Jesúsjavaberena.

<sup>51</sup> Nexata Jesúsjanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo bitso pitaxutotsëcënaenë, jumaitsi Jesúsjavabelia:

—Jesús, jitsipajé taitaxutoxanepanaejava, jai.

<sup>52</sup> Nexata Jesús jumaitsi:

—Ponare baja. Nesivajamatabëjumaitsimë: “Jesús nitaxutoxanepanaeyaexanaena,” nesivajamatabëjamë. Bajaraxuata itaxutoxanepaname baja, jai Jesús Bartimeojavabelia.

Bajarapacuenia Jesús pejumaitisijavata, Bartimeo baja xaniavaetsia tane. Nexata baja bajaraponë Jesús pepëta napona.

## 11

*Pacuenia Jesús pata Jerusalén tomarata yabara pelivaisi*

(Mt 21.1-11; Lc 19.28-40; Jn 12.12-19)

<sup>1</sup> Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenë, bajarajota Jesús barëpata. Bajarajota pebarëpatsicujinae Jesús itoroba anijanëbeje pijajivitonëbeje. <sup>2</sup> Jesús jumaitsi pijajivitonëbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeliaabeje, pataenutsianamebeje burro, pecëtanutsinëtsi. Bajarapaburro itsajivi ata abaxë apo jumaponae. Paisinaenamebeje. Payamaëcarenamëbeje tsane. <sup>3</sup> “¿Detsa xuajitsia paisinamebeje

burro?" itsa pacajaibeje tsane itsajivi, nexata pajumaitsimëbeje tsane: "Vajatuxanenë raja namatavenona. Aeconoxae raja icatsia canaviatiarena," pajamëbeje tsane, jai Jesús pijajivitonëbej javabelia.

<sup>4</sup> Nexata Jesús pijajivitonëbeje liabeje. Caxitarababanutabeje burro baupa muxuneneta. Cëtanutatsi burro namuto muxuneneta. Nexata bajaraponëbeje burro isinabeje.

<sup>5</sup> Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

<sup>6</sup> Nexata bajaraponëbeje jumaitsibeje pacuenia baja Jesús itorobatsibeje. Nexata tocopatatsibeje pecaponaenexabeje. <sup>7</sup> Nexata jane baja burro capatabeje Jesúsjavaberena. Nexata Jesús pijajivi pijacamisajumavelia penaxatabijavanë burro tsijumajeba. Bajarapajumata Jesús ecaya. <sup>8</sup> Jesús penajetarucaenamutojavarena jivi ayaubitsaëtoxaneto pijacamisajumavelia penaxatabijavanë namutua tsivajënaeyerequejebaponatsi. Itsamonaenae maxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yaiyataeya Jesús pecopiapitsinexatsi. <sup>9</sup> Jesús penajetarucaejavata jivi ayaubitsaëtoxaneto Jesús pevajënaeya namataxainaeya najetarubena. Itsabitsaëtoxaneto Jesús pecovëya cotocaevanajetarubena. Daxita bajarapamonae vavajai tsanajetarubena. Jumai tsanajetarubena:

—¡Dioso yavenonaenatsi maponë najetaruaje! ¡Vajatuxanenë pejamatabëcueneta najetaruca!

**10** ¡Dioso yavenonaenatsi maponë najetaruaje nacua pevetsinënexa! ¡Pacuenia bajayata vajasalinainëmi Davidpijinëmi nacua eveta, bajarapacuenia evetsijitsia! ¡Nexata vaxaitsi pexaniajamatabëcuene rajutatsi Diosojavabelia! jai tsanajetarubenaе bajarapamonae.

**11** Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petaenexa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

*Pacuenia Jesús bijataenuta higueranae piacuajibixae yabara pelivaisi*

(Mt 21.18-19)

**12** Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetaruacejavata, piajani. **13** Jesús namutovecua tajiyotalia higueranae yabaxua taenuta. Nexata Jesús taeyojopalía bajaraponae pecuai perubnaejava. Itsa Jesús pata bajaraponaejavabelia, ëpebaxu saya tsanucae. Tsipaji cajena abaxë apo penacuaitsimatacabí. **14** Nexata Jesús jumaitsi higueranaejavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsijava higueranaejavabelia.

*Pacuenia Jesúis Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi*

*(Mt 21.12-17; Lc 19.45-48; Jn 2.13-22)*

<sup>15</sup> Jesúis, pijajivi yajava, pata Jerusalén tomarata. Nexata Jesúis joneya temploboyalia. Nexata templobota Jesúis tane pecanajetabiabivi, pecomuacaevinua. Nexata daxita bajarapamonae Jesúis pitsapaeyaexana templobovecua. Palata pecambiababiabivi ata pijamesanëmi Jesúis topënëyorobajaraba. Ucucu pecanajetabiabivi ata penabiabijavanëminua topënëyorobajaraba.

<sup>16</sup> Jesúis apo tocopatsi itsajivi ata itsacuenejava pecaponaenexa templobojava. <sup>17</sup> Jesúis livaisi tsipaeba. Jumaitsi bajarajota pepatsivijavelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanéjavaberena penavajëcaebo tsane,” jai Dioso pejumaitsijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesúis templobota pecanajetabiabivijavelia.

<sup>18</sup> Sacerdotevi penamatacaitorobivi, judíovi pecujarubivinua, jumetane daxita pacuenia Jesúis exana jivijavelia templobota. Nexata bajarapamonae najumejaita pacuenia Jesúis beyaxuabijitsatsi. Bajarapamonaes cujunavatsi Jesúis. Tsipaji daxitajivi jamatabëcuenenabenajaca Jesúis petsipaebilivaisi yabara. <sup>19</sup> Ajena baja meravitsia, Jesúis yajavapona pijajivi Jerusalén tomaravecua.

*Pacuenia higueranae tēpanuca yabara pelivaisi  
(Mt 21.20-22)*

<sup>20</sup> Jesú斯 pijajivi barëmajita Betania tomarata. Nexata bajayacunua Jesú斯 icatsia, pijajivi ya-  
java, najetaruca pecovënamatua. Bajarapamonae  
taenuta higueranae baja petépanucaejava daxita  
yatabutopaya. <sup>21</sup> Nexata Pedro najamatabënapita  
higueranae Jesú斯 pebijataenutsijava. Nexata Pe-  
dro jumaitsi Jesúsjavabelia:

—Tajatuxanenë, jica, taema. Ponae higueranae  
bijataenutame, tēpanuca baja. ¿Detsa meta pacue-  
nia tēpa baja? jai Pedro.

<sup>22</sup> Nexata Jesú斯 jumaitsi pijajivijavabelia:

—Paxamë bitso pajumecovënëre Dioso  
papecatoexanaenexa pacuenia pavajëtame.  
<sup>23</sup> Xaniajanë pacuenia pacatsipaebijitsatsi.  
Itsa pajamatabëjumaitsimë tsipae Dioso  
yabara: “Dioso nejumecovënëtsiana xua  
vajëtsianajë Diosojavabelia,” itsa pajamatabëjamë  
tsipae, pacajumecovënëtsipa mapatsuto  
ataje. Nexata itsa pajumaitsimë tsipae  
mapatsutojavabeliae: “Natixire majotavecuaje.  
Pucaxanetojavabelia jopare,” itsa pajamë tsipae,  
pacajumecovënëtsipa. Nexata mapatsuto ataje  
paneitorobicuenia, pacajumecovënëtsipa. Itsa  
pajumecovënëtsianame Dioso papecatoexanae-  
javanexa, itsa panajamatabëxainaenamenua  
Dioso ëpapecajumecovënëtsijavanexa, xua  
pavajëtsianame Diosojavabelia, Dioso  
pacajumecovënëtsiana. <sup>24</sup> Bajaraxuata  
pacajumaitsitsi. Daxita xua pavajëtsianame  
Diosojavabelia, pasivajamatabëjumaitsimë tsane:  
“Xua vajëtajë Diosojavabelia, pepacuene Dioso

nejumecovënëtsiana," pasivajamatabëjamëre. Nexata xua pavajëtsianame Diosojavabelia, Dioso pacajumecovënëtsiana. <sup>25</sup> Itsajivi pibisiacuene papecexanaejava, pajamatabëcuene caevare panevajëtsijavata Diosojavabelia. Nexata pabarajamatabëcuene xanepanare bajarapajivi. Nexata pijinia paneaxa, athëbëtatsia peecaenë, jamatabëcuene caeviana paxamë ata pitabarata pibisiacuene paneexanaejava. <sup>26</sup> Paxamë itsa apo pajamatabëcuene caevimë tsane itsanë pibisiacuene papecexanaejava, itsa apo pabarajamatabëcuene xanepanaemënu tsane, nexata pijinia paneaxa, athëbëtatsia peecaenë, apo jamatabëcuene caevi tsane paxamë pitabarata pibisiacuene paneexanaejava. Apo pacabarajamatabëcuene xanepanaenua tsane, jai Jesús pijajivijavabelia.

*Pacuenia Jesús caëjëpatsi daxitacuene pexanaenexa yabara pelivaisi  
(Mt 21.23-27; Lc 20.1-8)*

<sup>27</sup> Jesús, pijajivi yajava, pata Jerusalén tomarata. Jesús itsa ponapona templobota, nexata sacerdotevi penamatacaitorobivi, judíovi pecujarubivinua, judíovi pijaancianovinua, parena Jesúsjavaberena. <sup>28</sup> Nexata bajarapamona jumaitsi Jesúsjavabelia:

—¿Jipatsa pejamatabëcuena pecanajetabiabivi, pecomuacaevinua, capitsapame mapatemplobovecuaje? jai bajarapamona Jesúsjavabelia.

<sup>29</sup> Nexata Jesús jumaitsi bajarapamona ejavelia:

—Xanë copiaya caejumeyo pacayanijobianatsi. Itsa paxamë panejumecaviatsianame, nexata xanë juya pacatsipaebianatsi ponë nitoroba taexanaenexa bajarapacuene.

<sup>30</sup> ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? Panejumecanaviare baitsi jane, jai Jesús bajarapamonaejavabelia.

<sup>31</sup> Nexata épamonae nabarëcuaicuajai. Naju-maitisi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. <sup>32</sup>“Jivi raja saya pejamatabëcueneta Juanpijinë jivi bautisabaponapona,” acuenebi vajajaijava. Tsipaji mapatomarapijivije ayaubitsaëtoxaneto Juanpijinë yabara sivajamatabëjumaitsi: “Juanpijinë raja pepacuene Diosojumepaebinëmi,” sivajamatabëjai. Nexata bajarapamonae nacabeyejebijitsipa, najai Jesús peyanijobivitsi.

<sup>33</sup> Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuene, jai Jesús.

# 12

*Pacuenia exana piajamatabëcuenabejevi, itsanë  
pijauvabacabo petoevetsivi, yabara pelivaisi  
(Mt 21.33-46; Lc 20.9-19)*

<sup>1</sup> Jesús livaisi tsipaeba sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata. Jumaitsi mapacueniaje:

—Pijaira pexainaenë pijairata uba ayaibacoboxaneto uvavënëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabajavanexa. Bajaraxuacujinae pijauvabacabo tuatuajéta exananuta piapiabotsia, penacuatisimatacabí itsa tonaveretatsi, athëbëyo pevetabiabecaenexa pijauvabacabo. Nexata bajaraponë itsamonaevetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatocabi cuainaveretsiana, natsicobetsatsianatsi. Patocabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona. <sup>2</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabí penotsinexa, nexata uvabacabo pexainaenë

itoroba pijajivitonë. Itoroba petoevetsivitsijavabelia petsicobetsatsinexatsi. <sup>3</sup> Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatsiaexanaliatsi. <sup>4</sup> Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobiaxuabatsi. Pibisiacuenia tobijatanetsi. <sup>5</sup> Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeyajuvënëvi itsamonae totsaquibabiatsi. Itsamonae tobeyejebatsi.

<sup>6</sup> Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. <sup>7</sup> Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonae najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. <sup>8</sup> Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús

sacerdotevi penamatacaitorobivijavabelia, judíovi pecujarubivijavabelia ata, judíovi pijaancianovijavabelia ata.

<sup>9</sup> Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonaevetsiaexanaena bajarapauvabacabo, jai Jesús bajarapamonaejavabelia.

<sup>10</sup> Icatsia Jesús jumaitsi:

—Payapētaneme rabaja pacuenia Dioso pejumelivaisibaxutota tajévelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonaebøjexaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaëtsiana botabu daxita itsaibo matatoxenetsia.

<sup>11</sup> Vajatuxanenë Dioso raja exanaena bajarapacuene. Nexata nacatsita pexaniacuene bitso tsane bajarapacuene, jai tajévelia Dioso pejumelivaisibaxutota xanë yabara.

Bajarapacuenia tajévelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

**12** Bajarapamonae picani Jesús ja-matabëvaetabatsi. Tsipaji bajarapamonae jumeyapëtanetsi Jesús pejumaitsijava bajarapamonae yabara. Itsiata abaxë apo vaetabitsi. Tsipaji cujunava jivi. Nexata baja Jesús bajarapamonae vecuapona.

*Pacuenia Jesús jamatabëcueneëjëbiaya yanijobatsi impuestomatamo pemamatotsijava yabara pelivaisi*

(Mt 22.15-22; Lc 20.20-26)

**13** Fariseoviyajuvënëvi, Herodes pijajiviya-juvënëvinua, najetarubena Jesúsjavaberena. Bajarapamonae pevetsivitsi itorobatsi livaisi peyanijobinexatsi Jesús. Nexata Jesús bajarapamonae bijiaya itsa jumecanaviata, peneconitsinexatsi picani nacuaevetsinëjavabelia.

**14** Nexata bajarapamonae pata Jesúsjavaberena. Bajarapamonae jamatabëcueneëjëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petux-anëvi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajaili-vaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae ja-matabëcueneëjëbiaya Jesúsjavabelia.

**15** Itsiata baitsi jane Jesús jamatabëcuneyapëtane bajarapamonae jamatabëcueneëjëbiaya peyanijo-bijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

**16** Nexata bajarapamonae Jesús tocaponare-natsi palatanëyo. Nexata Jesús jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyotaje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

**17** Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacue-nia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaitsi:

—¡Xaniavaetsia baja rovia Jesús panejumecanaviata! jamatabëjai.

*Pacuenia Jesús tsipaeba jivi petëpaecujinae icatsia  
piasaëjavanexa yabara pelivaisi  
(Mt 22.23-33; Lc 20.27-40)*

<sup>18</sup> Saduceovi saicaya itsalivaisi xaina. Bajarapamonae jamatabécuenenavëxaniabiaya jumai tsabiabi: “Petépaevi rabaja petépaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesùs. Saduceovi jumaitsi Jesùsjavabelia mapacueniae:

<sup>19</sup> —Jesùs, Moiséspijinë bajayata vajanacatoyaquinaelivaisi, jumaitsi mapacueniae: “Ponë pematapijinë pepua penacojiobinë baja, totépatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. <sup>20</sup> Nexata jinavanapa ënacaemonae siete ponëbeje. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva. <sup>21</sup> Nexata pematapijinëmi pepénarucaenë pita pematapijinëmi pijavami. Nexata icatsia bajaraponë ata têpa pexi xainaenejeva bajarapovajavelia. Nexata icatsia itsanë tuatuajëmatapijinë pita bajarapova. Bajaraponë ata icatsia têpa pexi xainaenejeva bajarapovajavelia. <sup>22</sup> Bajarapacuenia têpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xainae bajarapovajavelia. Bajaraxuacujinae belia bajarapova ata têpa baja. <sup>23</sup> “Jivi raja petépaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonaeyajuvënë, pijava tsane bajarapova bajarapamatacabi? Daxita pamonae

siete ponëmibeje, nacaemonae, pitapona picani bajarapovami, jai saduceovi Jesúsjavabelia.

<sup>24</sup> Nexata Jesús jumaitsi saduceovijavabelia:

—Paxamë saya pajamatatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemëna pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

<sup>25</sup> Pamatacabí raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonaco-jiobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa. <sup>26</sup> Itsa pepacuene paxamë paneyanijobame Dioso icatsia piisaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Moiséspijinë pey aquinaebaxutota jumaitsi. Bajarapabaxutota jumaitsi pacuenia Moiséspijinë Dioso barëcuaicuajaiti tsquirinaemëyo petajueyecaecotiajavaverena. Abraham baja pepuatëpae, Isaac ata baja pepuatëpae, Jacob ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje: “Xanë rabaja abaxë Abraham pijadiosonë, Isaac ata pijadiosonë, Jacob ata pijadiosonë,” jai Dioso Moiséspijinëjavabelia bajayata petëpaevimi yabara. <sup>27</sup> Bajarapacuenia Dioso pejumaitsixae, nayapëtane bajarapamonae bajayata tëpae ata, Diosovecua apo penaxuabijava. Aeconoxae

ata bajarapamonae Dioso yajavajinavanapa athëbëtatsia. Nexata paxamë itsa pajumaitsimë: “Petëpaevi rabaja petëpaecujinae, icatsia apo asaë tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

*Palivaisi bitso jivi bejumecovënëta daxita  
Dioso pitorobilivaisianë pejumecovënëtsijava  
matatoxenetsia yabara pelivaisi*

(Mt 22.34-40)

28 Judíovi pecujarubinë pata Jesúsjavaberena. Nexata bajaraponë Jesús jumetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

29 Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijinë papemomoximë, pajumetaema. Vajatuxanenë rabaja caenë Dioso. 30 Bajaraponë panijatuxanenë, panijaDioso, daxita panejamatabëéthëtojavavetsina pasivamëre. Pasivamëre daxita panejamatabëcuenaesaëta ata, daxita panesaëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava

matatoxenetsia. <sup>31</sup> Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

<sup>32</sup> Nexata icatsia judíovi pecujarubinë jumaitsi Jesúsjavabelia:

—Jesús, xanajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. <sup>33</sup> Bejumecovënëtatsi Dioso daxita vajajamatatabëëthëtojavavetsina, daxita vajanajamatatabëxainaesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajuitabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

<sup>34</sup> Jesús itsa jumetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

—Tsiquirijavayo catosaica Diosojavabelia nenajamatatabëcuene copatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesú斯 cujunavatsi. Nexata baja Jesú斯 jivi jamatabëcueneëjëbiaya livaisi apo yanijobitsi.

*Pacuenia Jesucristo yabara Davidpijinë bajayata tajëvelia: “Tajatuxanenë” jai, yabara pelivaisi (Mt 22.41-46; Lc 20.41-44)*

<sup>35</sup> Jesú斯 livaisi tsipaeba templobota. Jesú斯 pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatoceuene, ponë athëbëvetsica Dioso itorobijitsatsica jivi pecapanepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijinë pemomo tsane,” jai tsabiabi. <sup>36</sup> Davidpijinë bajayata Espíritu Santo pejamatabëcuenetajëvelia jumaitsi Cristo yabara mapacueniaje: Dioso jumaitsi tajatuxanenëjavabelia: “Ecare abaxë tacujuanenia. Vecatsivajënae jumecovënëtsiaexanaenatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai bajayata tajëvelia Davidpijinë mapacueniaje Cristo yabara.

<sup>37</sup> 'Nexata Davidpijinë bajayata Cristo yabara: “Tajatuxanenë,” itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesú斯 judíovi pecujarubivi pecanaëjëtsinexa Cristo Dioso pexënatoceuene.

Nexata jivibitsaëtoxaneto Jesú斯 pejumetaevitsi jumebarëyatanetsi.

*Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi  
(Mt 23.1-36; Lc 11.37-54; 20.45-47)*

<sup>38</sup> Jesús jivi ayaibitsaëtoxanetojavabelia, pijajivijavabelia ata, livaisi tsipaeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsipaebapona, panejume covënëtsianiva. Bajarapamonaе jitsipabiaba tomara tuatuajéjava piapiajavanë penaxatababiabavanapaenexa jivi peyaiyataenexatsi. Jitsipabiabanua bitso yaiyataeya pebajacobinexatsi callejava. <sup>39</sup> Bajarapamonaе itsa najoneyabiaba judíovi penacaetuababiбonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyaiyataevitsi penaenexa petsinubijavanëta. Bajarapamonaе itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanëta. <sup>40</sup> Bajarapamonaе yamaxëitojorobiaya vecuanotabiabanua pamonajivi pevecuatëpaevanëtsi pecobecovëjavaxi. Bajarapamonaе itajara pinijicuenia vajëcabiaba Diosojavabelia. Itsiata pepo pexaniajaijamatabëcueneta apo vajëcabiabi. Bajarapacuenia vajëcabiaba saya jivi petaenexatsi Dioso itajara bitso bepejumecovënëtsivi. Nexata bajarapamonaе bitso pinijicuenia Dioso naneconitsiaexanaenatsi pamatacabí Dioso naneconitsiaexanaena daxita pamonaе Dioso apo pejumecovënëtsivi, jai Jesús judíovi pecujarubivi yabara.

*Pacuenia ofrenda rajuta Diosojavabelia  
pamona pevecuatëpaevatsi yabara pelivaisi  
(Lc 21.1-4)*

**41** Itsamatacabí Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayaijava palata pexainaevi, caejivi canacujitsia, ayaijava palata jepona. **42** Bajarajota napata pamona pevecuatëpaevatsi, bepejiobiva. Nexata bajarapova naja anijapalatanëyobeje piamatamobinëyobeje. **43** Nexata Jesús junata pijajivi. Jumaitsi pijajivijavabelia:

—Xaniajanë pacuenia pacatsipaebijitsatsi. Mapovaje pamona pevecuatëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenebarëya daxita xua itsamonae jia bajarapacajonita matatoxenetsia. **44** Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

## 13

*Pacuenia Jesús pijajivitonëjavabelia tajëvelia tsipaeba itsamatacabí itsanacuapijivi templobo pexu-*

*abijavanexatsica yabara pelivaisi  
(Mt 24.1-2; Lc 21.5-6)*

<sup>1</sup> Itsa baja Jesús, pijajivi yajava, pitsaparena templobovecua, Jesús pijajivitonë jumaitsi Jesúsjavabelia:

—¡Tajatuxanenë, jica, nataema mapaibotoxanetonëje, mapaboxanetonë ataje! jai Jesús pijajivitonë.

<sup>2</sup> Nexata Jesús tajévelia jumaitsi pijajivitonëjavabelia:

—Daxita raja mapaboxanetonë tanemeje, bajarapoboxanetonëmi itsamatocabi itsanacuapijivi penetsianica irabetsica. Nexata mapaibotoxanetonëmije itsaiboto ata pejumavereca apo bocae tsane, jai Jesús tajévelia pijajivitonëjavabelia.

*Pacuenia itsijitsia Jerusalén tomarata,  
daxitanacuanëjava ata, mapanacua pecopiaru-  
caevajënaeje yabara pelivaisi*

*(Mt 24.3-28; Lc 21.7-24; 17.22-24)*

<sup>3</sup> Jesús eca petsutojumata. Patsutojumata olivonaenë apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatatabëxëyo pijaepatojavata Jesúsjavabelia jumaitsi:

<sup>4</sup> —Patajatuxanenë, pajitsipajë patanetsipae-binexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë itsa copiapatsijitsia xua jumaitsimë templobo yabara? jai bajarapamonae Jesúsjavabelia.

<sup>5</sup> Jesú斯 nexata tajëvelia vajunupaeba pacuenia itsamatacabi itsijitsia mapanacuataje. Jesú斯 jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa.

<sup>6</sup> Tsipaji raja peyamaxëitojorobivinexa ayaubitsaëto patsiana bexanë itajara tsane. Bajarapamonae najumetsënëtsiaya jumai tsane: “Xanë raja Cristonë, Dioso athëbëvetsica taneitorobinëtsica jivi tacapanepaenexa,” jai tsane. Bajarapamonae jivi, ayaubitsaëto yamaxëitojorobiana.

<sup>7</sup> 'Vajabitsaë pexanaejava imoxoyonacuanëjava, tajënacuanëjava ata, pavënélivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatocabi mapanacuaje abaxë apo vereverecajuni tsane. <sup>8</sup> Mapanacuaje pevereverecaevajënae peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ira najëabiana ayaicuenia nacuanëjava. Ayaikaniboxaneto najetarucaena nacuanëjava. Ayaicuenia bitso jivi bejiobi tsane nacuanëjava. Daxita bajarapacuene itsa pataename, saya abaxë taxuxuabaponaena piayaicuene, jai Jesú斯 pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

<sup>9</sup> Icatsia Jesú斯 tajëvelia vajunupaeba pacuenia itsamatacabi itsijitsia mapanacuataje. Jesú斯 jumaitsi pijajivijavabelia mapacueniaje:

—Nexata paxamë xania panayajivitaename. Tsipaji raja xanë patajajivixaemë, tomara pevetsivijavabelia pacacaponabiabiana.

Bajarapamona pacajumaconibabeyabiabiana judíovi penacaetuatabiabibonëta. Paxamë patajajivixaemë pacanubiana nacuaevetsivi pitabarata, presidentevi ata pitabarata. Nexata bajarajota bajarapamona/javabelia patsipaebianame xanë talivaisi. <sup>10</sup> Nexata daxitanacuanépijivijava patsipaebanajetarube-naename pecapanepaelivaisinexatsi. <sup>11</sup> Itsa pacataicaena papecaneconitsinexa nacuaevetsivijavabelia, pëtsa pajamatatabëcuenebëjamë panenayajivicuaicuajainexa bajarapamona/javabelia. Palivaisi panejamatabëcuenevetsina pacatonaitajëtsiana, patsipaebianame bajarapamona/javabelia. Tsipaji raja bajarapaepatota Espíritu Santo pacacuaicuajaiyaexanaena. Paxamë baitsi panejamatabëcueneta apo pacuaicuajamë tsane. <sup>12</sup> Bajarapamatocabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevetsivijavabelia papecabeyaxuabinexa. Paneaxa ata, paneena ata, pacacanajetsiana nacuaevetsivijavabelia papecabeyaxuabinexa. Panexi ata pacacanajetsiana nacuaevetsivijavabelia papecabeyaxuabinexa. <sup>13</sup> Daxitajivi pacaitoya tsane patajajivixaemë. Itsiata pajivi ajamatatabëcuenesaë tsane Dioso pejume-covënëtsijava nacua pecopiarucaejavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuenia itsamatocabi itsijitsia mapanacuataje.

<sup>14</sup> Icatsia Jesús tajëvelia vajunupaeba papayaicuene itsamatocabi copiapatsijitsia Jerusalén tomarata. Jesús jumaitsi pijajivijavabelia

mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piayaicuene pevajunupaebilivaisi bajayata yaquina. Xua panijatomaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë pataename bajarapapiayaicuene penucaejava templobota, itsajota picani apo benuae. Nexata Judea nacuata pejinavanapaevi itsa vënëlivaisitaena bajarapapiayaicuene penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia. <sup>15</sup> Pajivi pijabojumata athëbëyo ecaya, itsa vënëlivaisitaena bajarapapiayaicuene penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyalia pejutsinexa pecobecovë. <sup>16</sup> Pajivi pijinia nacuenebaponapona pijapabita, itsa vënëlivaisitaena bajarapapiayaicuene penucaejava templobota, bepijia najetabajiraviana. Pëtsa naviata pijaboyalia pejutsinexa penaxatabi-java. <sup>17</sup> ¡Papetiriavi penacueto yacotajinavanapa, bitso bejiobi tsane bajarapamatacab! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacab! <sup>18</sup> Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabí parëcëpecaename, pexaniamatacabí Dioso pacatocopatsiana bitso nabejiobitsiaya paneponaeyaniva. <sup>19</sup> Tsipaji

raja bajarapamatacabí bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejobicuene taena. Bajaraxuacujinae icatsia itsamonaе bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tsipaji Dioso epatua yatuucutsiana jivi bitso nabejiobitsiaya pejinavanapae-matacabianëminexa, bitso jivi nabejiobitsia pejinavanapaeyaniva. <sup>20</sup> Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabí copiapatsijitsia Jerusalén tomarata.

<sup>21</sup> Icatsia Jesús tajëvelia vajunupaeba pacuenia itsamatacabí mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi. Jesús jumaitsi pijajivijavabelia mapacueniae:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nuaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. <sup>22</sup> Itsamonaе jumai tsane: “Xanë raja Cristonë,” jai tsane. Itsiata jemajai tsane. Itsamonaе jumai tsane: “Diosojumepaebinënë raja, profetanënë,” jai

tsane. Itsiata jemajai tsane. Bajarapamonaे itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonaе yamaxëitojorobaponaenatsi. Itsiata pamonaе pepacuene Dioso pijajivi, Dioso pitapetsivitsi, bajarapamonaе apo yamaxëitojorobi tsanetsi. <sup>23</sup> ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesùs pijajivijavabelia tajëvelia pevajunupaebijavata pacuenia itsamatacabi mapanacuataje patsijitsia peyamaxëitojorobivi Dioso pejumecovënëtsivi peyamaxëitojorobinexatsi.

*Pacuenia Jesùs tajëvelia navajunupaeba icatsia pepatsijavanexatsica petepaecujinae yabara pelivaisi*

(Mt 24.29-35, 42, 44; Lc 21.25-36)

<sup>24</sup> Jesùs tajëvelia navajunupaeba itsamatacabi icatsia pepatsijavanexatsica. Jesùs jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae matacabipijijuameto aitaquiri tsane. Meravipijijuameto ata aitaquiri tsane. <sup>25</sup> Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane. <sup>26</sup> Nexata bajarapaepatota xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Pat-sianicajë daxitacuene taevetsinexa. Tanivenivenaecotia yajavapatsianicajë. <sup>27</sup> Bajaraxuacujinae

ángelevi itorobianajë, pamonae tajajivi, Dioso pitapetsivitsi, daxitanacuanëjavaverena tanetocae-tuatsinexa xanëjavaberena, jai Jesús pijajivijavabelia tajévelia penavajunupaebijavata itsamata-cabi icatsia pepatsijavanexatsica.

<sup>28</sup> Icatsia Jesús tajévelia vajunupaeba pacuenia itsamatacabi itsijitsia mapanacuataje. Jesús ju-maitsi pijajivijavabelia mapacueniaje:

—Pacanaëjëre pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa.

<sup>29</sup> Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. <sup>30</sup> Xaniajanë pacuenia pacatsipaebijitsiatsi. Pitsijamatatabëcuenevi

aeconoxae mapamatacabitaje jinavanapa, bajarapitsijamatatabëcuenevi abaxë, bexëajavabelia ata, apo vereverecaе tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. <sup>31</sup> “Itaboxo, ira yajava,

tsitecaena daxitamatocabijavabelianexa,” jamatabëjai ata tsane itsamonaе, itsiata jamatabëcuenenavëxaniabiana. Tsipaji jemata

itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajévelia pevajunupaebijavata pacuenia itsamatacabi itsijitsia mapanacuataje.

**32** Jesú icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsjitsia daxita xua yabara tajëvelia pacatsipaeabtsi. Athëbëpójivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesú pijajivijavabelia.

**33** Icatsia Jesú jumaitsi pijajivijavabelia:

—Xania baja tsane. Daxitamatacabí saya panecopiaevetavanapaename. Tsipaji raja apo payapëtaemë tsane paepatota patsjitsianëtsica. **34** Nexata pacuenia bo pexainaenë, pijabo evetsiaexana pijajivi, bajara xanë itsinë tsane. Bo pexainaenë itsa ponaejitsia tajënacuayabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaejavanelxatsi pecovëta. Nexata pijajiviyajuvënëne itoroba baupa pevetsinënexa petoevetabiabinexatsi pijabobaupa. Bo pexainaenë jumaitsi bajaraponëjavabelia:

“Xaniavaetsia netoevetabiabianame baupa matapania tapatsimatacabijavabelianexa,” jai bo pexainaenë. **35** Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsjitsianëtsica. Ajena meravi, caecanivia, patsipajë. Meravi tuatuajëta ata patsipajë. Matacabivëpata ata patsipajë. Bajayacunua ata patsipajë.

**36** Bajaraxuata xania baja tsane. Daxitamatacabí saya panecopiaevetavanapaename. Jemata itsa patsipajë, paepatota apo panecopiaevetsimë,

pacacaxitajarabijitsipatsi      panemajitsijavata.  
<sup>37</sup> Palivaisi pacatsipaebatsi paxamëjavabelia,  
 daxitajivinexa jumaitsinë.      ¡Daxitamatacabí  
 saya panecopiaevetavanapaename!      jai Jesús  
 pijajivijavabelia.

## 14

*Pacuenia picani Jesús pijavajabitsaë  
 jamatabévaetabatsi yabara pelivaisi  
 (Mt 26.1-5; Lc 22.1-2; Jn 11.45-53)*

<sup>1</sup> Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajérëbinejeva pexanaepan. Nexata bajarapafiestabejevajënaeya, sacerdotevi penamatacaitorobivi, judíovi pecujarubivinua, najumejaita picani bajarapafiestajava pevaetabinexatsi Jesús. Penajumetsënëtsilivaisita picani jamatabévaetabatsi Jesús pebeyaxuabine-  
 atsi. <sup>2</sup> Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacueniabiyaniva, najai bajarapamonae.

*Pacuenia Jesús petiriva tsimataepanatsi petuxu-  
 juviaceitera yabara pelivaisi  
 (Mt 26.6-13; Jn 12.1-8)*

<sup>3</sup> Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxu-juviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëtoxobiaxuaba bajarapora,

petuxujuviaceitera. Bajaraxuacujinae Jesús tsimataepanaicatsi bajarapaaceitera.<sup>4</sup> Bajarajota itsamonaे penaenaevi itsa taeyena Jesús petsimataepanaejavatsitsica, bajarapamonae jamatabëanaepanareca. Nexata épamonae najumai tsenae:

—¿Detsa xuajitsia saya xuaba bajarapacuenia maporaje? <sup>5</sup> Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae épamonae.

Bajarapamonae anaepana bajarapovajavabelia.

<sup>6</sup> Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. <sup>7</sup> Daxitamatocabi raja bepejiobivi jinavanapa itsaxuayo pajinavana-pame. Pamatacabí pajitsipame pexaniacuene panetoexanaenexa bepejiobivijavabelia, nexata patoexanaename. Itsiata baitsi jane xanë daxitamatocabi apo ponaponaenë tsane paxamëjavata. <sup>8</sup> Mara papetirivaje pexaniacuene netoexana pacuenia baja cuenecaëjëpatsi. Itsamonaе petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo t  pae atanë. Nexata baja bajarapova neperabëxaniavaeta itsamonaе tanemëthëtsivajënae. <sup>9</sup> Xaniajanë pacuenia

pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabibadianua pacuenia exana xanëjavaberena mapapetirivaje, jai Jesús pijajivijavabelia.

*Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi (Mt 26.14-16; Lc 22.3-6)*

<sup>10</sup> Jesús pijajivi doce ponëbejeyajuvënénë pevënë Judas. Itsavënë Iscariote. Nexata Judas pona sacerdotevi penamatacaitorobivijavabelia. Jesús Jane baja yajumejiliatsi pecanajetsinexatsi. Nexata Jane baja Judas Jesús canajetatsi sacerdotevi penamatacaitorobivi pecobeyabelia. <sup>11</sup> Nexata sacerdotevi penamatacaitorobivi itsa tane bajara-pacuene, barëya. Jumaitsi bajarapamonae Judas-javabelia:

—Palata pacarajutsianatsi, jai.

Nexata Jane baja xuacujinae Judas Jesús naitax-utocaevetaponaponatsi. Nexata paepatota Judas toyapëxanepanatsi, perajutsinexa Jane baja bajara-pamonae pecobeyabelia.

*Pacuenia Jesús barënabane pijajivi pecopiarutsinabani baja pebeyaxuabivajënaetsi yabara pelivaisi*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Junua Jane baja fiesta, pafiestajava judíovi baxane levadurata matajëréabinejeva pexanaepan. Bajarapamatocabi ovejaxi babia pexaanexa pascua fiestamatocabi. Nexata Jesús yanijobatsi pijajivi.

—¿Detsa belia paponaeñajë patacamitsaexanaenexa pascua fiestamatacabí pexaejavanexaenexa? jai Jesús pijajivi.

<sup>13</sup> Nexata Jesús itoroba anijanëbeje pijajivitonëbeje. Jumaitsi:

—Tomarabelia paponarebeje. Bajara-jotalia pacaxitajarabianamebeje mera canalito pecanajetarucaenë. Bajaraponë papënajanjetarucaenamebeje. <sup>14</sup> Pabota bajaraponë joneyojopaena, bajarapabo pexainaenëjavabelia pajumaitsimëbeje tsane: “Vajanacacujarubinë raja jumaitsi: ‘¿Detsa jota pënëyatuuucutsibo eca, pabota tajajivi barëxaejitsianë xua jivi baxane pascua fiestamatacabí?’ jai raja vajanacacujarubinë,” pajamëbeje tsane bajarapabo pexainaenëjavabelia. <sup>15</sup> Nexata athëbëabetsia anijairabeje pënëyatuuucutsibojavata, pacatsitajëtsianabeje. Bajarapaboënëta athëbëyotsia paira ayaiënëtuatuajë tsane. Daxitacuene bajarajota xainaena. Nexata vajxaejavanaxa bajarajotatsia paexanaenamebeje, jai Jesús pijajivitonëbejejavabelia.

<sup>16</sup> Nexata Jane baja ponabeje Jesús pijajivitonëbeje. Patabeje baja tomarabelia. Caxitajarababeje daxita pacuenia Jesús jumaitsitsibeje. Nexata xua jivi baxane pascua fiestamatocabí daxita Jesús pijajivi pebarëxaenexa, bajaraponëbeje exanabeje Jane baja.

<sup>17</sup> Itsa baja meravitsia, Jesús patajopa bajarajota pijajivi, doce ponëbeje, yajava. <sup>18</sup> Daxita mesata pexaeyenaejavata, Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

**19** Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

**20** Nexata Jesús jumaitsi pijajivijavabelia:

—Doce paponëmëbejeyajuvënënë raja. Ponëbeje peneta caecuenia panajuacajabutsianajëbeje panbë platojavabelia, bajaraponë tsane.

**21** Nexata xanë, Daxitajivi Pematapijinënë, tëpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

**22** Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

**23** Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajarapora apa.

<sup>24</sup> Jesús pijajivijavabelia jumaitsi:

—Tajana raja othopaena jivi ayaubitsaëtoxaneto pecapanepaenexatsi. Nexata tatëpaejava pejamatabëcueta, jivi yapëtaena pepacuene xani-ajai Dioso jivi pecapanepaejavexa, pacuenia baja cajena tajëvelia Dioso najumecapanepaeya jumaitsi. <sup>25</sup> Xaniajanë pacuenia pacatsipaebi-jitsiatsi. Xanë rabaja matavëjëa apo apaenë tsane uvacuaira mapanacuataje, matapania icat-sia apaenajë Dioso pijanacuatsia pejanauvacuaira, jai Jesús pijajivijavabelia.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi*

*(Mt 26.30-35; Lc 22.31-34; Jn 13.36-38)*

<sup>26</sup> Jesús pijajivi barëanaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaax-ayo, bajarapatsutojumabelia barëpona. <sup>27</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejubitsaëto nacayajatsia rëcëpecaena,” jai Dioso pejumelivaisibaxutota

paxamë patanexuabarëcëpecaejavandexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.<sup>28</sup> Itsiata baitsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

<sup>29</sup> Nexata Pedro jumaitsi Jesúsjavabelia:

—Daxita mapamonaejé caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>30</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsatsi. Ajena rabaja, pameravi, nanianaevëpata, anijajumebeje vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>31</sup> Itsiata Pedro ajumesaëya jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia  
Getsemanívënëjavata yabara pelivaisi  
(Mt 26.36-46; Lc 22.39-46)*

<sup>32</sup> Jesús, pijajivi yajava, pata Getsemanívënëjavata. Bajarajota Jesús jumaitsi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

<sup>33</sup> Nexata Pedro, Santiago, Juan, bajara saya pamaatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca. <sup>34</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaJAVA yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

<sup>35</sup> Nexata Jesús, caenë, pevajënaeyabelia icatsia tsiquirijavayo ponataba. Tsipaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejiobitsiaya pebeyaxuabiyaniivatsi. <sup>36</sup> Nexata Jesús pevajëtsijavata Diosojavabelia, jumaitsi:

—Taxa Diosomë, netocopatame picani tanebeyaxuabinexa betajiobicueneta. Daxitacuene raja cacaëjëpa nexanaenexa. Nexata necapanepare bajarapabejiobicuenevectua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

<sup>37</sup> Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—Simón, ¿pamajitanubename tsaja? ¿Apo pacacaëjepae tsabaja rovia caeepatoyo ata paneaitavatsenaenexa? <sup>38</sup> Pëtsa pamajitame. Paitavamëre. Pavajëre Diosojavabelia pibisiacuene paneexanaeyaniva. Tsipaji raja dovathi pacajamatatabëcueneëjëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatatabëcuenesaëmë pexaniacuene paneexanaenexa, jai Jesús Pedrojavabelia.

<sup>39</sup> Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. <sup>40</sup> Icatsia Jesús naviarena pijajivijavaberena. Caxitaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijisia Jesúsjavabelia. <sup>41</sup> Icatsia abaxë Jesús naviata pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. <sup>42</sup> Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara*

*pelivaisi*

(Mt 26.47-56; Lc 22.47-53; Jn 18.2-11)

**43** Jesús pijavajabitsaë pevaetabijavatanexatsi, cuaicuajai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënénëmi. Judas pénanajetarubenatsi jivi ayaubitsaëtoxaneto. Bajarapamonaeyajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata.

**44** Judas pebarërenavajënae bajarapamonaes, copiaya baja cajena Judas tsipaeba pacuenia bajarapamonaes yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajara-ponë pavaetabianame. Pacobecëtsianame xaniavaetsia. Nexata panecobecëtsinë pacaponaermenä, jai baja cajena Judas pematacanajetarucaevijavabelia pebarërenavajënae.

**45** Nexata jane baja Judas itsa patanajetaruca, exana pacuenia baja cajena jumaitsi pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene.

**46** Nexata jane baja Jesús pijavajabitsaë vaetabatsi. Cobecëtatsi xaniavaetsia.

**47** Bajarajota Jesús pijajiviyajuvënénë pijaespada navemarajonotaxuabina. Muxuyoropaebi-axuaba sacerdotevi pepo penamatacaitorobinë

pijajivitonë. <sup>48</sup> Nexata Jesús jumaitsi pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. <sup>49</sup> Xanë caematacabí canacujitsia Dioso pejumelivaisi paxamëjavabelia pacatsipaebabiabatsi templobota. Itsita bajarapamatocabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajévelia jumaitsi xanë yabara, jai Jesús pevaetabivitsijavabelia.

<sup>50</sup> Nexata jane baja Jesús pijavajabitsaë pevaetabajatatsi, daxita Jesús pijajivi xuabarëcëpecatsi pacuenia baja cajena Jesús jumaitsi tajévelia pijajivijavabelia.

*Pacuenia pevëjëato najetabajirava yabara pelivaisi*

<sup>51</sup> Pevëjëato pënajanjetaruca Jesús pecaponaevitsi. Sábanata namataquinanajetaruca. Nexata pevëjëato bajarapamonae yasábanavaetabatsi.

<sup>52</sup> Nexata pevëjëato sábana naisinaxuaba. Najetabajirava jumasanë.

*Pacuenia Jesús nutatsi judíovi penamatacaitorobivi pitabarata yabara pelivaisi*

(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Jesús caponaliatsi sacerdotevi pepo penamatacaitorobinë pijaboyabelia. Nacaetuata bajarajota daxita sacerdotevi penamatacaitorobivi,

judíovi pijaancianovi ata yajava, judíovi pecujarubivi ata yajava. <sup>54</sup> Itsa baja Jesús caponaliatsi, nexata Pedro bajarapamona pecovëya tajiyo na-jetaruca. Sacerdotevi pepo penamatacaitorobinë pijabo matatoyorotsia yacaranata ibopanaxane-tonë, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavelia, itsabelia Jesús ca-junuatsi. Nexata sacerdotevi pepo penamatacaitorobinë pijabopanabota, Pedro nanonopeca isoto muxuneneta templobopijipolicíavita.

<sup>55</sup> Nexata bajarapabo ènëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajai. Bajarapamona nayanijoba.

—¿Jipatsa yapëtane Jesús pibisiacuene pexanae-java, paneconi yabara beyaxuabijitsiatsi? najai tsaponae.

Itsíata bajarapamona apo caxitajarabi itsaneconi ata Jesús pijaneconi. <sup>56</sup> Itsamona sayá penajumetsënëtsilivaisi paeba Jesús yabara. Itsíata caelivaisi najuapaebi ata, najumejëpaeya apo paebi bajarapamona. <sup>57</sup> Itsamona nonobapuna. Penajumetsënëtsilivaisi paeba Jesús yabara. Penonobapunaeviyajuvënëne jumaitsi mapacueniae:

<sup>58</sup>—Paxanë raja, pamatabëxëyo panubenajë ma-jotaje, pajumetaniji Jesús pejumaitsijava. Bajara-ponë jumaitsi: “Xanë raja xuabianicajë mapatem-ploboje, jivi pexanaebo. Acueyabi matacabita icatsia itsabo veretetsianajë. Jivi apo pexanaebo tsane,” jai maponë Jesúsje, jai penonobapunaeviyajuvënëne.

**59** Itsiata daxita bajarapamonae najumejëpaeya apo paebi.

**60** Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejume-canaviatsinexa? ¿Xaniajai tsabaja pacuenia mapamonaе caneconitsiajumaitsije? jai Jesúsjavabelia sacerdotevi pepo penamatacaitorobinë.

**61** Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinë jumaitsi Jesúsjavabelia:

—¿Xamë tsabaja pepacuene Cristomë, athëbëvetsica Dioso pecaitorobinëtsica jivi necapanepaenexa? ¿Xamë tsaja, Dioso pexënatomë? jai.

**62** Nexata Jesús jumaitsi bajaraponëjavabelia:

—Jäjä, xanë rabaja. Paxamë raja panetaename, Daxitajivi Pematapijinënë, taecaejava Dioso pecujuanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

**63** Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsënëa apo namatavenonaetsi itsamonaе vajanacatsipaebinexa paneconi yabara maponëje naneconitsiaexanaejitsiatsi.

64 Paxamë rabaja pajumetaneme maponëje Dioso apo pejitsipaecuenia pecuaicuajaijava. Tsipaji Dioso bepexënato nataeya cuaicuajai. ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

65      Nexata      bajarapamonaeyajuvënëvi  
Jesús      itabarasuabatsi.      Bajaraxuacujinae  
papaëbërëpanata      itaxutocëtatsi.      Pitaxu-  
tocëtsicujinaetsi      itabaratsaquinibabeponatsi  
pecobethaitonëta.      Nexata bajarapamonae jumai  
tsaponae Jesúsjavabelia:

—¡Vënëjonare ponë caitabaratsaquinibabepona!  
jai tsaponae bajarapamonae.

Bajaraxuacujinae      templobopijipolicíavi  
itabarapacabiaxuabatsi Jesús.

*Pacuenia jane baja Pedro nayavajunuaxaina  
Jesús pijajivitonëcuene yabaral pelivaisi*

(Mt 26.69-75; Lc 22.56-62; Jn 18.15-18, 25-29)

66 Itsa abaxë Jesús sacerdotevi pepo penamatacaitorobinë pijabo ënëtuatuajéalia yanijobaponatsi xua yabaral naneconitsiaex-  
anaejitsiatsi, Pedro naitaxutocaevetsiaya naeca bopanabota.      Nexata bajarajota taeyetatsi petiriva, sacerdotevi pepo penamatacaitorobinë pijabota penacuenebiva.      <sup>67</sup> Bajarapova Pedro taeyetatsi penanonopecaejavata.      Nexata

bajarapova naitaxutobabatsia asaëya taenucatsi Pedro. Jumaitsitsi:

—Xamë ata rabaja naponaponame Jesústa, Nazaret tomarapijinëta, jaitsi.

<sup>68</sup> Nexata Pedro itsiata nayavajunuaxaina Jesús pijajivitonëcuene. Nexata Pedro jumaitsi bajarapovajavelia:

—Jume raja. Apo yapëtaenë cajena bajaraponë. Apo yapëtaenë pacuene yabara nejumaitsimë, jai Pedro.

Bajaraxuacujinae Pedro pejonebaupajavaverenajavelia natixilia. Nexata vacara fiaba.

<sup>69</sup> Icatsia bajarapova Pedro tanetsi. Nexata pamonae bajarajota nubena, bajarapamonaejavabelia bajarapova jumaitsi:

—Mara ponëje Jesús pijajiviyajuvënëne, jai bajarapova Pedro yabara.

<sup>70</sup> Icatsia nexata Pedro jumaitsi:

—Jume raja. Apo yapëtaenë cajena bajaraponë, jai.

Bajaraxuacujinae, icatsia caeepatoyocujinae, bajarajota penubenaevi Pedro jumaitsitsi:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijinëmë. Galilea nacuapijivi pecuaicuajiaicuenia cuaicuajjamë, jaitsi.

<sup>71</sup> Nexata Pedro pejumexaniataenexatsi, ajumsaëya jumaitsi:

—Itsa apo xaniajanë tsipae paxamëjavabelia, nexata Diosojavelia naneconitsipajë. Apo yapëtaenë cajena ponë yabara panejumaitsimë, jai Pedro.

<sup>72</sup> Itsa baja Pedro najumevereta bajarapacuenia pejumaitsijava, vacara icatsia fiaba. Nexata bajarajota Pedro najamatabënapitajaråba pacuenia Jesús jumaitsitsi: “Anijajumebeje vacara pefiabivajënaeya, nayavajunuaxainaename tajajivitonëcuñemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús peju-maitsijumetsi yabara. Pedro nexata nua.

## 15

*Pacuenia Jesús nutatsi Pilato pitabarata yabara pelivaisi*

(Mt 27.1-2, 11-14; Lc 23.1-5; Jn 18.28-38)

<sup>1</sup> Ajena baja matacabí tsarucapona, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacaetuata. Icatsia pematatsënëa itsamona bajarapitsijamatabëcuñevi yajavanacaetuata penabarëcuaicuajainexa. Bajaraxuacujinae bajarapamona Jesús cobecëtsiaya caponaliatsi nacuaevertsinë Pilatojavabelia. <sup>2</sup> Nexata Pilato yanijobatsi Jesús.

—¿Xamë tsaja judíovi pepo nevertsinë? jaitsi.

Nexata Jesús jumaitsi Pilatojavabelia:

—Jäjä, xanë rabaja pacuenia nejumaitsimë, jai Jesús Pilatojavabelia.

<sup>3</sup> Sacerdotevi penama itsamona bajarapitsijamatabëcuñevi yajtacaitorobivi jumaitsi Pilatojavabelia:

—Jesús raja bitso pibisiacuene exanabiaba, jai.

<sup>4</sup> Nexata icatsia Pilato yanijobatsi Jesús.

—¿Itsalivaisiyo ata tsaja apo yapëtaemë nejume-canaviatsinexa? ¿Apo jumetaemë mapacuenia pecaneconitsijavaje? jaitsi.

<sup>5</sup> Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

*Pacuenia baja Pilato tocopata Jesús pebeyaxu-abinexatsi yabara pelivaisi*

(Mt 27.15-31; Lc 23.13-25; Jn 18.38-19.16)

<sup>6</sup> Nacuaevetsinë Pilato xaina pijacujirucuene. Caevai canacujitsia, pascua fiestamatacabí, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamatacabí. Bajarapacuenia Pilato caenë copatabiaba jivi pesivajamatabëcuene xanepanaenexatsi.

<sup>7</sup> Pamatacabí Jesús naneconitsiaexanatsi, bajarapamatacabí Barrabásvënëñë jivi pebarëbevi barënanéconitsiaponapona penaneconitsivi pejebabiabibota. Barrabás, itsamonaе yajava, barënabia picani gobierno pijajivijavabelia. Nexata taicatsi. Naneconitsiaexanejebatsi penaneconitsivi pejebabiabibota. <sup>8</sup> Nexata jivi pona Pilatojavabelia. Jumaitsi bajarapamonae Pilatojavabelia:

—Pacuenia pascua fiestamatacabí copatabiabame caenë pepitsapaenexa penaneconitsivi pejebabiabibovecua, bajarapacuenia panetocpare caenë pepitsapaenexa penaneconitsivi

pejebabiabibovecua, jai bajarapamonae Pilatojavabelia.

<sup>9</sup> Nexata Pilato jumaitsi bajarapamonaejavelia:

—¿Pajitsipame tsaja patacatocopatsijava pepitsapaenexa Jesús, pajudíovimē pepo papecaevetsinë? jai Pilato.

<sup>10</sup> Bajarapacuenia Pilato jumaitsi tsipaji yapétane pajamatabécuene yabara sacerdotevi penamatacaitorobivi tocaponarenatsi Jesús. Pilato jamatabécueneyapétane sacerdotevi penamatacaitorobivi Jesús pecueneitoyaxaetsi petocaponaejavatsirena. <sup>11</sup> Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëcame Jesús pecopatsinexatsi, jai baja cajena sacerdotevi penamatacaitorobivi jivijavabelia.

<sup>12</sup> Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyarabajainëjavabelia? jai Pilato judíovijavabelia Jesús yabara.

<sup>13</sup> Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

<sup>14</sup> Nexata Pilato jumaitsi bajarapamonaejavelia:

—¿Detsa pitsineconi yabara nexata cobematabiabarutsiaeexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaeexanare! jai tsaponaes.

<sup>15</sup> Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatatabëcunexanepanaeya petaenexatsi. Nexata Pilato pijajivi, vajabitsaëvi, itoroba copiaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

<sup>16</sup> Nexata baja vajabitsaëvi Jesús caponaliatsi nacuaevertsinë Pilato pijaboxanetojavabelia. Nexata bajarajota nacaetuata daxita vajabitsaëvi.

<sup>17</sup> Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevertsinë banaxatata, bajaraxua xatatatsi benacuaevertsinëcuenia petaenexatsi. Coronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi.

<sup>18</sup> Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponaes bajarapamonae Jesúsjavabelia.

<sup>19</sup> Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubenajoneyabiabatsi Jesús pitabarata.

<sup>20</sup> Jesús quenetsiataeya

pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesùs baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesùs cruzajavabelia cobematabiabarutatsiyabara pelivaisi  
(Mt 27.32-44; Lc 23.26-43; Jn 19.17-27)*

<sup>21</sup> Alejandrobeje Rufobeje paxa, Simónvënënë, Cirene tomarapijinë. Nexata Simón najetaruca vayafotusatojavaverena. Nexata vajabitsaëvi Simón junatatsi, pacruzajavabelia Jesùs cobematabiabarutsijitsiatsi, peyavenonaeyacponaenexa.

<sup>22</sup> Caponaliatsi Jesùs Gólgotavënë tsutojavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejajume.

<sup>23</sup> Bajarajota picani Jesùs rajutatsi vinora piapaenexa, pematajérëabira mirravënëjavata, bitso penavixaetaeyaniva pecobematabiabajatatsi cruzajavabelia. Itsiata Jesùs apo apae.

<sup>24</sup> Nexata jane baja Jesùs vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesùs penaxatatsijavami, xua jumaponapona. Bajarapacuenia vajabitsaëvi natsicobetsana Jesùs penaxatatsijavami.

<sup>25</sup> Bajayacunuaepatota, a las nueve, Jesùs cobematabiabarutatsi cruzajavabelia.

<sup>26</sup> Bajarajota Jesùs pematabocoto matatsënëyo

yaquinaruta tablapayota itsamonaé ata  
peyapétaenexa pajamatabécuene yabara Jesús  
cobematabiabarutatsi cruzajavabelia. Jumai  
tsarutsi peyaquinarutsiitane cruzajavata  
mapacueniaje: “Mara ponéje judíovi pepo  
pevetsinéje,” jai tsarutsi Jesús yabara.

<sup>27</sup> Anijanébeje penacobetoxotsinébeje, Jesús  
yajavacobematabiabarutatsi. Caené canacujitsia  
pijacruzata rubatsi. Bajaraponébeje Jesús  
pemuxuneneta rutatsibeje. Itsané Jesús pecu-  
juanenia rutatsi. Itsané Jesús petsavenonenia  
rutatsi. <sup>28</sup> Bajarapacuenia Jesús itsa yajava-  
cobematabiabarutatsi penacobetoxotsinébeje,  
nexata Jesús tocopiapatatsi pacuenia baja cajena  
Dioso pejumelivaisibaxutota tajévelia jumaitsi  
Jesús yabara. Dioso pejumelivaisibaxutota  
tajévelia jumaitsi Jesús yabara mapacueniaje:  
“Naneconitsiaexanaenatsi bepibisiacuene  
pexanaenécuenia,” jai baja cajena tajévelia Dioso  
pejumelivaisibaxutota Jesús yabara.

<sup>29</sup> Jesús pecobematabiabarutsijavatatsi cruza-  
javabelia, bajaraxuayo penajetarubenaevi Jesús  
itaropitsiaya bijataeyabiabatsi. Jumai tsabiabi  
bajarapamonae:

—Yiara jane maitsiméje. Xamé raja imata ju-  
maitsimé: “Xuabianicajé templobo. Acueyabi  
matacabita icatsia veretetsianajé itsabo,” jamé.  
<sup>30</sup> Nacapanepare jane baja nijacuata. Cruza-  
javavetsica runaimica, jai tsabiabi Jesúsjavabelia  
bajaraxuayo penajetarubenaevi.

<sup>31</sup> Bajara pijinia pacuenia sacerdotevi pena-  
matacaitorobivi, judíovi pecujarubivi ata, capoc-

aponatsi Jesús. Ëpamonae najumaitsi:

—Maponëje itsamonaе yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo caejëpaetsi. <sup>32</sup> Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabarutatsi, bajaraponëbeje ata, Jesús bijataerucatsibeje.

*Pacuenia baja Jesús tēpa yabara pelivaisi  
(Mt 27.45-56; Lc 23.44-49; Jn 19.28-30)*

<sup>33</sup> Jesús baja itsa tēpaejitsia, ajena matonejejitsia, daxita nacuajava aitaquiri tsajuni. Matapania caniviyojavelia, bejamatabëcuene a las tres, nacua napebeta icatsia. <sup>34</sup> Nexata icatsia paepatota nacua napebeta, bajarapaepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitstijume: “TajaDioso, tajaDioso, ¿detsa xuajitsia baja tajaepato necopatame?” pejajume.

<sup>35</sup> Nexata itsamonaе bajarajota penubenaevi bijiaya jumetane bajarapacuenia Jesús pejumaitstijava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Eliaspijinëmije, Diosojumepaebinëmi, jai bajarapamonae.

**36** Nexata bajarapamonaeyajuvënënë piajatuvinorayalia bepija jabutaxuaba esponjavënëjava. Bajaraxuacujinae esponjavënëjava naeboupita cétaruta. Toyotsiatsi picani Jesús petsutsuninexa bajaraxua. Ponë picani Jesús toyotsiatsi bajaraxua petsutsuninexa, bajaraponë jumaitsi penajuanubenaevijavabelia:

—Bajarapacuenia abaxë copatarutatsi Jesús. Taenatsi Elíaspjinë itsa najetaruca cruzavecua penutsinexatsitsica Jesús, jai bajaraponë capocaponaeya.

**37** Jesús icatsia pinijicuenia aëjai. Bajaraxuacujinae jane baja Jesús tēpanajereca.

**38** Paepatota Jesús tēpanajereca, bajarapaepatota templobo ènètuatuajéalia peyatuucutarutsipana, ayaipapaébérépanaxaneto, titititica tuatuajéareca, athëbëvetsicacujinae irabereca. **39** Nexata paepatota Jesús tēpanajereca, vajabitsaëvi pijacapitán Jesús pitabara canacujitsialia nuca. Nexata bajaraponë taenuca Jesús pinijicuenia peaëjaijava. Taenucanua Jesús petépanajetsijavareca. Nexata vajabitsaëvi pijacapitán jumaitsi:

—Matsaena ponë tēpaje, pepacuene baja rovia Dioso pexënato, jai.

**40** Bajarajota petiriavibitsaëtoxaneto tajiyoverena taenubena Jesús petépaejava. Bajarapapetiriavi tuatuajéta nanubena mapamatatabëxëyoje. Itsava Maríavënëva, Magdala tomarapijiva. Itsava Salomévënëva. Itsava icatsia Maríavënëva. Bajarapova Santiagobeje Josébeje pena. Bajaraponë Santiago, pevëjéato abaxë itsanë Santiagovënënëvecua.

<sup>41</sup> Pamatacabi abaxë Jesús ponapona Galilea nacuata, bajarapapetiriavi Jesús pënajinavanapatsi peyavenonaenexatsi. Papetiriavibitsaëtojavata Mariábana nanubena, bajarapapetiriavi ata Mariábana Jesús najuapënaponarena Galilea nacuaverena Jerusalén tomaraberena.

*Pacuenia Jesús petëpaenë mëthëtatsiyabara pelivaisi*  
*(Mt 27.57-61; Lc 23.50-56; Jn 19.38-42)*

<sup>42-43</sup> José Arimatea tomarapijinë, judíovi pevetsinë, peyaiyataenëtsi. Bajaraponë José copiaevetaponapona pecopiapatsijava pamatacabí caenë Dioso evetsijitsia daxita pijajivi mapanacuataje. Judíovi baja penacueraevetsimatacabinexa pevajënaeya pamatacabí, caniviyotsia baja. Bajarapamatacabí judíovi banacuenevereta baja penacuenebijava. Nexata bajarapaepatota José acueneura ata, najamatabësaëta. Nexata lia nacuaevetsinë Pilatojavabelia. Nexata José vajëta Pilatojavabelia petocopatsinexatsi Jesús petëpaenë pemëthëtsinexa. <sup>44</sup> Nexata Pilato jamatabëjumaitsi:

—Xaniajai tsamë rabaja Jesús tëpa, jamatabëjai tsipaji abaxë bajayajebi Jesús apo rucae cruzajavelia pecobematabiabarutsicujinaetsi.

Nexata Pilato junata vajabitsaëvi pijacapitán. Nexata Pilato yanijoba vajabitsaëvi pijacapitánjavabelia, Jesús petëpaecuene Pilato peyapëtaenexa. <sup>45</sup> Nexata vajabitsaëvi pijacapitán tsipaeba Pilatojavabelia.

—Jesús rabaja capanepaeya tëpa, jai.

Nexata jane baja Pilato José tocopatatsi cruzajavavetsica pepitsinexa Jesús petëpaenë.

<sup>46</sup> Nexata José comuata pexaniaviriasábana. Bajaraxuacujinae José jane baja cruzajavavetsica pitsica Jesús petëpaenë. Daxitanëreca mataquionaeaya matacacëba pexaniaviria piapiasábanapanata. Bajaraxuacujinae itsajota cajena José iboitapajanitojavata pinijiibovaju exanaeyaexanabuata petëpaevi pebuataponanexa, bajarapaibovajualia José buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. <sup>47</sup> María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

## 16

*Pacuenia Jesús petëpaecujinae icatsia asaë yabara pelivaisi*

*(Mt 28.1-10; Lc 24.1-12; Jn 20.1-10)*

<sup>1</sup> Judíovi baja penacueraevertsimatacabí itsa verevereca, acueyabi povamaxëto comuata petuxujuvira. Itsava Maríavënëva, Magdala tomarapijiva. Itsava Salomévënëva. Itsava icatsia Maríavënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë.

<sup>2</sup> Nexata baja judíovi penacueraevertsimatacabí itsa verevereca, meravia pitsijavata, ajena baja matacabí tsarucaponae, bajarapamonae ponalia Jesús pebuatsiibovajutsijavabelia.

**3** Nexata bajarapamonae namutualia najumaitsi tsanajetarubenaе:

—Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubenaе bajarapamonae.

**4** Nexata bajarapamonae itsa imoxoyotabuatapona, naëcobarëcëpalia ibovajujavabelia. Nexata taeyabuata ibopanaxanetomi petixitabuatsijavia ibovajuvëpavecua. Bajarapaibopana bitso pinijiibopanaxaneto. **5** Nexata petiriavi itsa joneya Jesús pebuatsiibovajutsijavia, taeyeta pecujuanenia pevëjëato. Bajaraponë naxatateca piapiajava penioponaejava. Nexata petiriavi najunaviaca. **6** Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucae majotaje. Pataema jane itsajota picani buatatsi. **7** Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuayabelia. Baja pina jotalia pacaxitarabianame Jesús pacuenia baja pacajumaitsitsi,” pajamë tsane pijajivijavabelia, jai pevëjëato petiriavijavabelia.

**8** Nexata saya bajarapapetiriavi rëcëpeca Jesús pebuatsiibovajutsivecua. Neconeojai saya pecajunavi. Nexata namutoepatua apo tsipaebi itsajivijavabelia ata. Tsipaji bitso junava.

*Pacuenia Jesús petëpaecujinae, icatsia itsa asaë, tsitanaitajëta María Magdala tomarapijivajavabelia yabara pelivaisi  
(Jn 20.11-18)*

<sup>9</sup> Judíovi baja penacueraevetsimatacabí itsa verevereca, meravia pitsijavata, ajena baja matacabí tsarucaponaé, Jesús icatsia asaë petëpaecujinae. Bajarapamatacabí copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapitsapa siete padovathibeje itsa abaxë Jesús apo beyaxuabitsi. <sup>10</sup> Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënueyena Jesús. Nexata María itsa pata Jesús pijajivijavabelia, tsipaeba pacuenia María tane Jesús. <sup>11</sup> María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai.

Itsiata Jesús pijajivi apo jumexaniataetsi María.

*Pacuenia Jesús petëpaecujinae icatsia itsa asaë, tsitanaitajëta pijajivitonëbejejavabelia yabara pelivaisi  
(Lc 24.13-35)*

<sup>12</sup> Jesús pijajivitonëbeje najetarucaebeje namutua. Nexata Jesús pijajivitonëbeje namutua penajetarucaejavatabeje, Jesús tsitanaitajëta beitsanëcuenia pijajivitonëbejejavabelia. <sup>13</sup> Nexata Jesús pijajivitonëbeje itsa tanebeje Jesús, naviatecabeje.

Nexata pacuenia tanebeje Jesús, tsipaebabeje itsamonaes Jesús pijajivijavabelia. Itsiata bajarapamonaes apo jumexaniataetsibeje.

*Pacuenia Jesús petëpaecujinae, icatsia itsa asaë, pijajivi itoroba pexanialivaisi jivi petsipaebanajetarubenaenexa daxitanacuanëjava yabara pelivaisi (Mt 28.16-20; Lc 24.36-49; Jn 20.19-23)*

<sup>14</sup> Bexéjavabelia icatsia Jesús tsitanaitajéta pijajivi once ponëbejejavabelia penabanenaejavata mesata. Nexata Jesús pinijicuenia muxujioba pijajivi piajamatabécuenetajaxae. Muxujiobanua apo pejumecovënëtsixaes petsipaebijavatsi pamonaes tane Jesús icatsia piasaëjava petëpaecujinae. <sup>15</sup> Nexata Jesús jumaitsi pijajivijavabelia:

—Paponare daxitanacuanëjava daxitajivi panetsipaebanajetarubenaenexa pexanialivaisi pecapanepaelivaisinexatsi. <sup>16</sup> Pajivi jumecovënëtsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovënëtsi tsane bajarapalivaisi, daxitamatocabijavabelianexa naneconitsiana Diosojavabelia. <sup>17</sup> Pamonaes peneta jumecovënëtsiana bajarapalivaisi, mapacuenia exanavanapaenaje. Tavënëta jivivecua capitalsapponaena dovathi. Itsaviriajumetanua, apo penatsipaebijumemi ata, jemata natsipaebiana. <sup>18</sup> Bajarapamonaes jomo pecobeta pitsi ata tsane, apae atanua tsane jivi petëpaeyaxanaera, itsiata apo tēpae tsane. Bajarapamonaes itsa nacobebuatsiana piavitanejivi pematatsënëvereeca, pejayatsijivi jamatejema tsane piavitanejavavecua, jai Jesús pijajivijavabelia.

*Pacuenia Jesús petëpaecujinae, icatsia itsa asaë,  
naviata baja athëbëabetsia yabara pelivaisi  
(Lc 24.50-53)*

<sup>19</sup> Vajatuxanenë Jesús livaisi petsipaebicujinae pijajivijavabelia, Dioso baja pesaëta catsiatsi athëbëabetsia. Nexata athëbëtatsia Jesús eca Dioso pecujuanenia penajuaevetsinexabeje daxitacuene. <sup>20</sup> Nexata jane baja Jesús pijajivi daxitanacuanëjava jivi tsipaebanajetarubena bajarapapexanialivaisi. Nexata daxita pamonae jumetaeyabiabatsi, jumecovënëtabiabatsi pexaniajailivaisi petsipaebicuene. Tsipaji Jesús pijajivi jamatabëcuneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabijavata.

## **Dios pejumelivaisibaxuto pejanalivaisibaxuto New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Guahibo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 21 Feb 2024 from source files  
dated 29 Jan 2022

bc03f416-faf8-5000-bfb5-5ca8a3fa98cf